

# **Basef Ifimba Pol Nanda'ef Fagafe'ma Esis Romi**

## **Basef bandafi Pol nanda'ef fagafe'ma esis Romi**

1:1-17 Basef fagali'i Pol nanifela Goda esis Rom sagahapifanai

1:18-3:20 Okom wandafunai Godi mapoma epes hiasi hi'alas, esis Juda saloma esis owa' Ju-daisia wapani

3:21-4:25 Epes mamahisa sagahapifa Jisas Kraisi, God nofalas na'i epes isimba be'es hilili'i

5:1-8:39 Apa' epes mamahepama magahapi-fanai mape opaf atotof maloma God mape mandagala maga' maloma Krais ea' mosafel wapani malomana mape namepa Ambal ananinai

9:1-11:36 God nihimba'mapa okom ananimi atom nandandepa epes mamahisa anen okom maga'iasi ea' na'ipapa anif basefa esis Israel anaf sope si'imama

12:1-15:13 Waf apa' Kristen

15:14-16:27 Pol na'i basef akutaifi ea' na'i basefa dagala ananini wapani nafe'ma esis Kristen sagape Romi

*Basef kofagefa Pol naga'ipa esis Roma maol aposel anen nanda'ani*

**1** Ae' Pol ape lafela Krais Jisas anda' maola anen atona. God nofale ma enda' maol aposel ea' nosahe'e ma egawalapa basef bu'wafi ananifi.\*

**2-4** Basef ifimba fagape na'amba. Fowa' gani God nala' lapa basef ifimba bu'wafi ea' na'ipa amom profet ananimi mawalipasef manda'ef fail buk Godi. Basef ifimba fa'i Nogamana ananinai, Jisas Krais dembinai ape'inai. Ea' nofa' alop apa' epesi nataga wambota aman dembinai king Deviti. Apa' dei' Ambal bu'unai Godi nawalapania alihina ma banagami Godi, anen Nogamana ananinai endilisi. Ambal anamba nasa'mana nogosafel wandof wapani.

**5** Lagof Jisasi atogof God natopalope dowaf nowa' banagae anda' maol aposela asa'ma agol Jisas Kraisi lu'wagol. Anen nanda'as na'amba ma anaf anis amam nematawa misi'ah hiasi hi'ilas sohapifana sogaila basef ananifi.

**6** Ipa' wapani pape mini'ap apamba. Ipa' pame' fala Jisas Kraisi ea' pailana pape ananipai.\*

**7** Ipa' epes Romipai, God okom maimailipa nofalepa ma pagape amam nematawa ananipai atipa. Ae' anda' basef ifimba fafi'mipai. Ae' a'i God ahamapa ape'inai noloma Dembinai ape'inai Jisas Krais motopalopepa dowaf mowa' banaga opalef ipe'ilifi fepe sa'ombel.\*

### *Pol na'i niti esis Rom*

**8** Ae' a'i ata' ili' iga'iesi isimba. Ae' anifela God ae'anai ma agol Jisas Kraisi, anifelona ma ipa'

\* **1:1** Ro 16:25-26; Ta 1:2; Mt 22:42; Ro 9:5,15; 2 Ti 2:8; Ap 13:2,33;

Ga 1:15      \* **1:2-4** Ap 26:16-18; Ro 15:18; Ga 2:7-9      \* **1:6** Nam

6:25-26; 1 Ko 1:2; 2 Ko 1:1; Ef 1:2      \* **1:7** 1 Te 1:8

wapani. Dei' main, esis itap ganimba hiagoma sa'i basef ifimba ma ipa' pagahapifana. \*

**9-10** God nogawa nemaf mamahefa andabete-nafi okom ae'ami mandanda' ma ipa' anda'mepa beten. Ae' anda' maol Godi aloma okom ae'ami si'ima agawalipasa basef bu'wafi ma Nogamana ananinai. Beten ae'ani nagape na'amba. Fowa' dondol nimaguf hiafi ahali'ana ma efo'o igatilipa. Owa', owa'atin. Dei' wapani ahali'ana ma anen ni'i awiai, nonda'me ano'w ufia'wa efo'o igatilipa.

**11** Ae' okom ma'i a'owa' ma atiasi efo'o igatilipa ma ewa' banagaepa egase'epa anis hiahaom fasimi Spirit Ambal Godi nogase'epam dowafi.

**12** Amamba na'amba. Ae' a'i hapif ae'ani netopalopa ipa' ea' ipe'ini netopalopa ae' newa' banagae. Isimba sowa' banaga opalef ape'ilifi na'amba atin.\*

**13** Ae' a'i ipa' alipipai ata' pegawa nimaguf hiafi ae' a'i efe'mago ipa' ea' afi'i ataga dei'. Owa' anis hiahawes sasopama ufia'wa ae'. Fowa' atopalopa anis sogololama Godi sataga Kristen salutu bangles. Ea' dei' a'i ata' etopalopepa si'i agatopalopa esis.

**14** Ae' wiaf fotaome ma egatopalopa epes hiasi Krais. Wiaf afamba na'amba. Krais natalowe maol lu'wani dei' ae' egwamanan etopalopa epes isimba hiasi hi'ilas. Ma sogogawa waf bu'wafi dambaifii soloma isimba sogololama waf dambaifii, epes gawaisi soloma isimba owa' gawaisia wapani.

\* **1:8** Ef 1:16; Fl 1:8; 1 Te 2:5,10; Ap 19:21; Ro 15:23,32    \* **1:12** Ap 19:21; Jo 15:16

**15** Isimba atis dei' opaf ae'afi fosafel endilisi ma egawalapa basef bu'wafi Godi ma ipa' epes Romipai wapani.\*

*Basef bu'wami Godi, amamba banagami ananimi*

**16** Ae' ina ombal mahe ambal aola egawalipasa basef bu'wami Godi, owa'atin. Ae' ahapifa basef amamba bu'wami banagewe a'owa'. Dei' main, amamba banagami Godi mofa' epes mamahisa sagahapifanai sogotanimai. Esis Juda sahapifi sali' ipa' hipai owa' Judaipaia pagi'. \*

**17** Dei' main, basef amamba bu'wami Godi mi-himba'mepa waf usi'ifi ananifi. Afamba na'amba. I'i apa' mohapifa Jisas banagepa atapipa, God ni'i apa' be'epa hilili'. Ina ano'w ufia'w daia'wa apa' mogataga be'epa hilili' ma nogohnaep ananisi, owa'atin. Hapif atin. Ufia'w si'i Baibel na'ias naga'l'i, "Epen ami nigahapifa Godi, anen ni'i anin bu'wani hilili'i ea' nepe namin atapin dondol."\*

*Esis hiasi sowa' alafugaha God*

**18** Dei' a' anaf owagama wapani okom numbutini Godi nifi'i heven notaga nondawalap atapina ma waf hiafi awafi epes sanda'afi hi'ilaf. Anen nogwamasa akafimi awami ma epes isimba hiasi sogowa' alafugaha waf bu'wafi ananifi sanda'waf awafii dei' sagataloga basef endilisifi ananifi. \*

**19** Dei' main, waf hiafi Godi ina fandambaho', owa'atin. Waf mamahefa dondo' ma gawa epesi

\* **1:15** Sam 119:46; Mk 8:38; 1 Ko 1:18-24; Ap 13:46

3:21-22; Hab 2:4 \* **1:17** Ef 5:6; Kl 3:6; 2 Te 2:12

14:15-17; Ap 17:24-28

\* **1:16** Ro

\* **1:18** Ap

God a' nihimba'masaf fataga alihif fandawalapa.  
\*

**20** Fowa' dambadamba God nanda' hiahaom hiami nogota atamba tafi'i tataga dei', esis sati hiahaom anen nanda'ami. Hiahaom amamba esis ilama sogogawa ma anef waf hiafi Godi esis owa' la'ifisa sogatelef naepia. Isimba na'amba. Esis satelef endilisi waf Godi kofagefa, anen dembinai nikila' amom dembami hiami magape itapi hi'alam. Esis sati waf afamba faloma banagami lu'wami ananimi magape lifilafi dondoli. Ea' isimba atis dei' esis ina ano'w ufia'wa sonda-hali' sombahoh' waf awafi asasifi soga'i, "Ae' owa' egawaea." Owa'atin.\*

**21** Esis sogawa God nape, apa' esis ina sogawa sa'i anen bu'unai endilisi ma sofela agol ananigli lu'wagol a'a soganifelona, owa'atin. Ukup asasimi mandapoma hiahaom falafalafumi atom ea' nelelemb asasimi ina mataga andeande', owa'. Mataga akutim awasim a'owa'. \*

**22** Esis aligah maso'as sa'ias sa'i, "Apa' mogogawai," apa' owa' esis sataga ukup mahamahasa waf bu'wafi. \*

**23** Ea' saso'ana alafugah God owa' nogaga'ia, ina sanda' lotumana sanifelona, owa'atin. Sandomba lawah otamba maim falafumi atom mataga god baso'amunai mandati si'i amiguf, mafis uguf maim maloma epes owa' sogape namis atapisia, ea' sanda' lotumam sanifelom.\*

### *Wafnaninani aunai*

---

\* **1:19** Jop 12:7-9; Sam 19:1; Hi 11:3    \* **1:20** Ef 4:17-18    \* **1:21**  
 Jer 10:14; 1 Ko 1:20    \* **1:22** Diu 4:15-19; Sam 106:20    \* **1:23** Ap  
 14:16

**24** Esis sandaiwa'ma God sowa' alafugahana. Isimba atis dei' anen nakwaha esis ea' ukup asasipi pehafel banagambel pahokolas sanda'waf hiafi alugufi. Sanda so'a waolaf sahambombaga alop asasipi. \*

**25** Dei' main, esis ukup paso'asa basef Godi endilisifi a sagi'ma basef baso'ami atom maho'ofa basef endilisifi ananifi. Ea' sanda' lotuma hiahaom amamba God nanda'ami, apa' anen, sosam-balona. God anen bu'unai kofagonama hiahaom amamba hiami, apa' mondasa'ma agol ananigili lu'wagol lifilafi endilisi.\*

**26-27** Ea' God nakwaha esis saila ukup epesi atipa sanda' waf awafi ambagof awagufafi. Sanda' waf afamba awafi faha'ofa waf daso'amaifi. Nematawa waila waf ikiakafi waloma anowa daiawa. Anom amam wapani manda'am na'amba atin. Ukup amamipi pehafel a'owa' pa'ipa'i amam daiam ama molomam monda' waf awafi. Ea' waf afambai fahambombaga ukup paloma alop amamisi dindi'i dondo' fagwa waf awafi amamifi.

**28** Ukup asasipi atip pandaiwa'ma sogahapifa God nomonas asasisi. Isimba atis dei' nape natitilis saila nomonas awami asasimi atoma sanda' waf naninani aunai owa' andeande'ma epes sonda'anaia.

**29-30** Esis sanda' waf hiafifafifi awafi fape si'ifa esis. Ukup pehafel pa'ipa'i sogofa' hiahaom hiami ma esis atis. Waf awafi aguffifa afamba. Ukup kowagalepa hiahaom bu'wami awami, ukup numbutipa sogaha anis, saha anis daiias

---

\* **1:24** Jer 13:25; Jer 16:19; Ro 9:5    \* **1:25** Lev 18:22; Lev 20:13; 1 Ko 6:9

sagaga', migimigah sambaso'ama sogofa' anom hiahaom anin openi dowadowafa, ea' sanda' maola sagahambombaga epes. Waf anamba aunai asi'ina endilisi ma esis. Ea' sanda'i'ipamas sa'i basef sawalapefa sogola'asa agof anis daiasi ma nogohnaep epes hiasii. Esis sataga bousi saloma God, gigal sa'oh sa'i digah lu'wami atom, sola'asa basef banagafi sagasa'ma agof asasigufi atogof. Ukup pandanda' ma waf naninani aunai dambainai. Ea' sosambala basef mamasasi.

<sup>31</sup> Esis sololama gawa bu'wani ma waf bu'wafi ea' sa'i basef andeande', apa' ina saila basef fimba asasifi datima, owa'. Esis ina ukup paipaila anis daias satilis uwahipis, owa'atin.

<sup>32</sup> Basefa mu'uli Godi usi'ini na'amba na'i, "Epes sanda' waf na'ambainai esis a' sondaga'." Epes isimba sogawa mu'uli inimba, apa' owa'atin. Sandanda' waf afamba awafi atef. Apa' ina sanda'af dowadowaf, owa'atin. Sasa'ma agofa anis daias sanda' waf awafi na'ambai sandagalas.

## 2

*Basefa kot God anaf nonda' masafi fefe' usi'if atef a'owa'*

<sup>1</sup> Ipa' mamahipama pa'i basef pagawalogga anis daiasi, atiasi kofagema ipe'imi atom. Peme', ipa' pa'i basef pagawalogga anis epes daiasi, waf afambai ipa' pandawalogga ipa' atipa. Dei' main, isimba ipa' pa'i basef pagawalogasi, ina' sanda' waf awafi.\*

<sup>2</sup> Apa' mogawa God nonda' kotima epes sanda' waf afambai awafi ma basef usi'ifi atef.

---

\* <sup>2:1</sup> Mt 7:1-2; Jo 8:7

**3** Apa' epen ina' nagasapaga anis epes deideiasi sanda' waf fafifafi na'ambaifii, epen ina' nanda' waf afambaii. Dei' ina' okom mandanda' ma'imama? Ina' atiasi la'ifinama nindihama basef God nonda' kotimasafi nefal' negafe? Owa'atin endilisi. \*

**4** God nanda'ena andeande' a'owa', ea' ata' nape nasasaena nogota lautai, ina nagwamena waf awafi nase'ena akafimi kwafalis, owa'atin. Waf afamba bu'wafi Godi ina' okom mandanda'maf na'i falafifi? Anen nanda'mena waf afamba bu'wafi ma ata' negambema nembel. A'i ina' negawaf a'a owa'?

**5** Ina' nanda' du'wanigai ea' dei' ina ata' nembema nembel, owa'. Ina' natama akafimi lu'wami nikikama ina' atina. Ama nemaf okom numbutinai Godi notaga alihina ma kota, nogowalogea pes hiasi ma basef usi'ifi banagafi ananifi. \*

**6** Nemaf afamba anen nowalogamasa waf epesi atona atin, nogwamasaf fendahama waf esis sanda'afi. \*

**7** Anis sagape banages atapisa waf bu'wafi sanda' maol solaoma ufia'wa sogofa' agof lu'wagufi, sigati mogogala'i ma sagape andeande' liflafi.

**8** Apa' anis ukup pandapoma esis atis ea' sowa' alafugaha basef endilisifi saila waf ikiakafi. Epes isimba anaf God okom numbutina a'owa' nindaiwa'masa waf awafi asasifi. \*

**9** Nimanimi lu'wami moloma akafimi anaf mupai' epes isimba hiasi sanda' waf awafii hi'ilas.

---

\* **2:3** Ef 1:7, 2:9; 2 Pi 3:15 \* **2:5** Mt 16:27; Jo 5:29; 2 Ko 5:10 \* **2:6**

2 Te 1:8 \* **2:8** Ro 1:16

Esis Juda sili' ea' isimba owa' Judaisia wapani sigi'  
solomas

<sup>10</sup> Apa' God anaf noso'asa poe bu'wani ma  
mogogala'i agof lu'wagufi foloma opalef awanilifi  
epes isimba hiasi sanda' waf fasifii. Esis Juda sili'  
ea' isimba owa' Judaisia sigi'. \*

<sup>11</sup> Dei' main, anen nowaloga epes hiasi ma ikwaf  
usi'ifi atef.

<sup>12</sup> Anen okom mandanda' na'amba. Epes  
mamahisa sogololama mu'uli God nagaso'  
Mosesani sanda' waf awafii, anaf a' higililas.  
Apa' epes Juda sogogawa mu'uli inimba ea'i ma  
dei' sanda' waf awafii, anaf nowalogasa mu'uli  
inimba atin. \*

<sup>13</sup> Ina epes isimba sagame' mu'uli dowadowafi  
sataga bo'wes hilili'ma naep Godi, owa'atin. Epes  
mamahisa same' basefa sagaila mu'ulii, isimba  
atis anaf God ni'i esis bo'wes hilili'i. \*

<sup>14</sup> Esis isimba sogololama Godi, waf asasifi  
na'amba. Esis mu'uli akas, apa' nemaf mamahefa  
sagaila malogofa nomon nelelemb asasimi, waf  
afamba a' fataga si'i mu'uli asasimi. Esis mu'uli  
Godi akas, apa' endilisi sailana waf afamba ma  
nelelemb asasimi.

<sup>15</sup> Waf afamba asasifi fihimba'mapa basefa  
mu'uli inimba fagape ukup asasipi. Ea' malogof  
fagape opalef asasimi nomoni, amamba wapani  
mihimba'mapa na'amba atin. Dei' main, ukup  
asasipi pa'ias pihimba'mas alihif na'amba. Anif  
nimaguf panda' kotimasa waf awafi, apa' anif

\* <sup>2:10</sup> Ef 6:9; 1 Pi 1:17   \* <sup>2:12</sup> Mt 7:21; 1 Jo 3:7   \* <sup>2:13</sup> Ap 10:35

nimaguf andeande' dondo'ma waf esis sanda'afi.  
\*

**16** Amamba anaf motaga na'amba atina nemaf afamba God nogawaloga waf hiafi epesi. Afamba anen ni'i ila ma Jisas Krais nope dembinai nogawaloga waf hiafi asasifi fandambahi'i feloma basef sa'if sagambaho'afi. Basef bu'wafi God ae' agawalapafi ifimba atif.\*

*Esis Juda sahapifa mu'uli inimba God nagaso' Mosesani atin sa'i mu'uli inimba atiasi a' netopalopas*

**17** Ipa' pendefala pa'i ipa' Juda pagahipifa mu'uli inimba fowa' God nagaso' Mosesani sisihina negatopalopepa pindihi'ama okom wandafumi Godi. Ea' ipa' pandasa'ma agof ipe'igufi panda'i, "Apa' mogawa God endilisinai."

**18** Ea' ipa' pegawa okom God na'i pigagi'mami ma pegelafa waf mu'uli inimba ma ukup pi'i waf usi'ifi pigailaf.

**19** Ipa' pegawa pa'i ipa' epes pegegawa basef Godi ma pigasindi'amona epes isimba naep pagaso'asi ea' pape si'i nagwapina epes isimba sagape akoti ma pigihimba'mas.\*

**20** Ipa' epes gawaipai pagawalipa isimba gawa akasi saloma anis daias sogololama basef Godii sagape si'i awasi ata' sa'wisi. Dei' main, ipa' pegawa pa'i basef endilisifi hiafi faloma gawa hiani hi'alas sape mu'uli inimba pelafan pegegawani.\*

**21** Basef ifimba atif hiafi fagali'i dei' fitanima fila ipa'. Ipa' pandawalipa anis epes daias, apa' ipa'

\* **2:15** 2 Ti 2:8   \* **2:16** Je 2:19   \* **2:19** 2 Ti 3:5,15; Mt 15:14; Lu

18:9   \* **2:20** Sam 50:16-21; Mt 23:3-4

owa' ata' pili' piwalipa ipa' atipaia? Ipa' pawali-pasa basef anis pa'i, "Ipa' ina a' penda' wal, owa'i", apa' ae' a'i ipa' wapani panda' wali?

<sup>22</sup> Ipa' pawalipasa basef anis pa'i, "Ipa' ina a' pehambombaga waf daso'amaifi, owa'i." Apa' owa' ipa' wapani panda' waf afambai awafi? Ipa' pandaiwa'ma god baso'amunai, apa' owa' apak-walopa hiahawes saga'oh ifagw epes sanda' lutuma god amamba baso'amii?

Na'ambai ina andeande', owa'.

<sup>23</sup> Ipa' pandasa'ma agofipe'igufi atogoflu'wagof panda'i, "Apa' mogogawa mu'uli Godii nagaso' Mosesanii." Apa' owa' ipa' pimbisila' mu'uli inimba panda' waf afambai atef dei' pahambombaga agol Godi. \*

<sup>24</sup> Waf ipe'ifi awef si'i basef fagail buki fa'ias faga'i, "Kofagema ea' ipa' Judai atom, dei' esis owa' Judaisia sogololama Godi sa'i basef sanda' agol Godi findiwagol."\*

*Waf sogatopa' alopafi ina fatopalopa epes, owa'.  
Sogahapifa God atona dao', sotaga dambais.*

<sup>25</sup> Endilisi, i'i ipa' Juda pihapila mu'uli inimba God nagaso' Mosesani pilan endilisi, dao' waf afamba magatopa' alopafi bu'wafi. Apa' i'i ipa' pegawala mu'uli inimba, atiasi a' pelelama God petaga na'amba atin si'i ipa' owa' pegatopa' alopia. \*

<sup>26</sup> Epes isimba owa' Judaisi sogatopa'mas alopia, esis sagape na'amba. I'i esis sīla waf afamba hiafi usi'ifi ma mu'uli inimba, atiasi

\* <sup>2:23</sup> Ais 52:5; Esi 36:20

\* <sup>2:24</sup> Jer 4:4, 9:25

\* <sup>2:25</sup> Ga 5:6

sotaga si'i isimba sagatopa'mas alopi ma naep Godi.

<sup>27</sup> Endilisi, esis owa' Judaisia atiasi sola' basef mila ipa' Juda. Dei' main, ipa' pegawa mu'uli God nagaso' Mosesani nagape buki ea' patopa' alop ipe'ipi, apa' owa' ipa' pimbisila' basefa mu'uli inimba. Apa' esis isimba owa' Judaisi sogatopa' aloopia saila basefa mu'uli inimba.\*

<sup>28</sup> I'i ipa' epes Juda dowadowaf, ipa' ina Juda endilisipai, owa'. Ea' waf afamba sagatopa' alopfafi ina waf alop atop si'ipi, owa'atin.\*

<sup>29</sup> Ipa' epes hipai Juda. I'i opalef ipe'ilifi fetauga dambailif, ipa' Juda endilisi. Waf sagatopa' alopfafi, God nanda'af opalef ipe'ilifi nomon. Maol inimba ina natagama basefa mu'uli nagail buki, owa'. Ambal bu'unai Ananinai atona nanda'an. Epen ami nenda'as na'ambai, anin agol akana nogohnaep epesi, owa'atin. Anin agol lu'wagola naep Godi atip.

### 3

*Wafawafi ina la'ififa figikila' wafbu'wafi, owa'*

<sup>1</sup> Dei' esis Juda sikila' anis daias owa' Judaisia ma waf maif bu'wafi? Waf bu'wafi maif fatagama waf afamba magatopa' alopfafi? \*

<sup>2</sup> Awasi! Waf hiafi fasifi fatagaf. Waf fagali'i afamba. God nali' naso'asa basef ananifi endilisifi atif esis Juda ma sugumafif. \*

<sup>3</sup> Endilisi, anis ina sahapifa basef ifimba ande-ande'. Owa' dei' ata' si'i main? A'i waf afamba

---

\* <sup>2:27</sup> Jo 7:24, 8:39      \* <sup>2:28</sup> Diu 30:6; Kl 2:11; 1 Ko 4:5; 2 Ko 10:18

\* <sup>3:1</sup> Sam 147:19-20; Ro 9:4      \* <sup>3:2</sup> Ro 9:6, 11:29; 2 Ti 2:13

awasifi asasifi atiasi fenda' God nokwaha basef endilisifi ananifi? \*

<sup>4</sup> Owa'atin endilisi. Apa' mi'i basef monda'i, epes hiasi sagambaso'ami, apa' God atotona naga'i basef endilisi dondoli, nanda' maol datimai si'i Baibel naga'i,

“Atiasi epes amam nematawa hiasi seme' basef ine'ifi si'i endilisifi atif. Nema afamba esis si'i sonda' kotimina, ina God atiasi nepa'agas nikila'as.”

<sup>5-6</sup> Dei' i'ipipa anif basef apa' epes ukup paga'iefi. Basef ifimba na'amba. Dei' ata' mama? I'i waf awafi ape'ifi fawalapai waf usi'ifi Godi fataga alihifai, apa' atiasi mi'ias mi'imama? Mi'i God nanda' waf awafi okom wandafuma nogagwamapa waf awafi ape'ifi? Owa'atin endilisi. I'i God nonda' waf awafiai, dei' anen nowaloga waf amam nematawa hiasi ma main? Owa'atin endilisi.

<sup>7</sup> Apa' anis epes ukup pandanda' dowaf sambaso'am sa'i, “I'i epes hiasi siti waf baso'afi awafi ape'ifi feloma waf Godi endilisifi ma sowalogaf, asogawa waf Godi fikila' waf ape'ifi. Ea' waf ape'ifi fawalapai agol Godi lu'wagol. Apa' na'ambaiai, God ina atiasi nogwamapa waf awafi ape'ifi, owa'atin.” Apa' owa'atin endilisi. \*

<sup>8</sup> I'i apa' mila ukup ipimbai atip, mefe' mefe' mi'i, “Awi, apa' a' monda' waf awafi ma mugawalapai waf bu'wafi Godi.”

Endilisi, anis epes sambaso'mas sa'i basef find-iwaefa ae' sa'i ae' aga'ias na'amba. Apa' owa'atin.

\* **3:3** Sam 51:4    \* **3:7** Ro 6:1,15

Epes isimba saga'i basef ifimbai, anaf God nogwama-sa waf awafi asasifi dondo'af atin.\*

*Ina anin epen bo'wen hilili' nape, owa'atin*

<sup>9</sup> Dei' si'i main? Basef ifimba doko'ifi kofagefa fa'i main? Fa'i apa' Juda mikila' anis daias owa' Judaisia ma waf bu'wafi, a'a owa'? Owa'atin endilisi. Ae' ihmiba'mepa basef ea', waf awafi faso'ala apa' hiapai hi'alapa, esis Juda saloma isimba sogololama basef Godi wapani. \*

<sup>10</sup> Baibel na'i isimba na'amba na'i,  
“Ina anin epen bo'wen hilili' nape, owa'atin endilisi.

<sup>11</sup> Ina anin epen negawa waf bu'wafi. Ina anin epen nanda' maol nelaoma God, owa'atin.

<sup>12</sup> Epes hiasi sololama ufia'w ea' sataga epes awasis endilisi hi' alas. Aho', owa' anin atitin bo'wena.  
\*

<sup>13</sup> Malogof asasimi mandahama si'i nowagah kwambifah sagawa epesa mindihianama alihim magape. Esis sa'i basef hiafi baso'afi faloma basef hiafifafifi ma sagahasopalo'wa anis epes daias, si'i nombot nagape uguf faha epes sagaga'. \*

<sup>14</sup> Dondol ukup asasipi numbutip a'owa' sa'i basef awami atoma sagaso'as nimanimi anis daias. \*

<sup>15</sup> Esis kwafalis atisa sagaha anis daias sagaga'.

<sup>16</sup> Dondol sahambombaga epes hiasi saso'asa akafimi nimanimi hiami.

\* **3:8** Ro 1:18–2:24; Ro 3:23  
\* **3:12** Sam 5:9, 140:3

\* **3:9** Sam 14:1-3; Sam 53:1-3; Ekl 7:20  
\* **3:13** Sam 10:7    \* **3:14** Pro 1:16;  
Ais 59:7-8

**17** Opalef asasilifi ina fape awanelefa sogape opalef atifilif sogaloma anis epes daias, owa'atin.  
\*

**18** Esis ina ukup paipaila God ombal mahasana ma sogaila waf ananifi, owa'atin.”

**19** Ea' dei' apa' mogawa basef mamahifa Godi fagape mu'uli anen nagaso' Moses ani fa'i apa' Juda mogape lafelani inimbai mondailan. Owa' ina la'ifipa mailan andeande', owa'. Ea' ina anin open la'ifina niga'i, “Ae' open bo'owe hilili'i,”

Owa'atin. Apa' epes hiapai ganimba hiagoma, kofagema mapoma apa' ma naep Godi anaf nogawalogapa. \*

**20** Dei' main, waf afamba mogaila mu'uli inimba, owa' anin open atitin attiasi negefa' agol open bo'wen hilili' ma naep Godia, owa'. Mu'uli inimba nihimba'mapa waf awafi ape'ifi ea!.\*

*Epen nagahapifa Kraisi, anin agol gataga open bu'wani Godi*

**21** Apa' dei' waf usi'ifi Godi ea' fataga alihigma fandawalap. Afamba ina fataga fagi'ma waf sanda' maol sa'i sogaila mu'uli fowa' God nagaso' Mosesani, owa'atin. Afamba fataga ano'w ufia'w na'amba. Basef hiafi Godi fagail Buki fawalapai waf afamba. Anif fail mu'uli inimba God nagaso' Mosesani ea' anif amom profet hiami manda'afi.  
\*

**22** Waf afamba na'amba. Epen nagahapifa Jisas Kraisi, inimba Godnofalan na'i open bo'wen hilili'i. Ea' apa' epes hiapai mogahapilafi hi'alapa,

---

\* **3:17** Sam 36:1   \* **3:19** Sam 143:2; Ro 7:7; Ga 2:16   \* **3:20** Ap 10:43   \* **3:21** Ro 1:17; Ga 2:16

God nanda'apa na'amba atin, esis Juda saloma isimba owa' Judaisia wapani. \*

<sup>23</sup> Apa' epes hiapai hi'alapa manda' waf awafi mumbisila' mu'uli Godi ea' ina la'ifipama atiasi mogati mogogala'i bu'wami ananimi, owa'atin. \*

<sup>24</sup> Apa' owa' God nati apa' uwahipipa, natopalopapa dowaf. Apa' mahapifa Krais Jisas ea' God na'i apa' bu'upai. Apa' ina maso'ana anis maefah matalona, owa'atin. Anen natopalopapa ma Krais Jisas ea' natagwahepa natalepa ma mogape wahifipa.\*

<sup>25</sup> God nihimba'masana alihina amam nematawa hiasi na'amba. Anen naga' esimbel ananimbeli balo bali'amona okom wandafunai Godi ma bagakwaha waf awafi epes mamahisa sagahapifanai. Ga' Krais Jisasi atin dei' God nihimba'mapa waf ananifi usi'ifi hilili'i na'amba. Fowa' nanda' esis amam nematawa sa'ombemas ea' ina nogwamasa waf awafi esis sanda'afi, owa'.

<sup>26</sup> Apa' dei' dao', anen nihimba'mapa waf usi'ifi ananifi ea' fataga alihigima ma nogagwamasa waf awafi asasifi. Isimba atis dei' apa' mogawa anen usi'ina hilili' hi'agalana! ma noga'i epes mamahisa sogahapifa Jisasi bo'wes hilili'i.\*

<sup>27</sup> Ea' dei' apa' ufia'w akapa ma mogasa'ma agof ape'igufi atogof lu'wagof, owa'atin. Ufia'w akwamba ea' kwaso'. Main da'im mahefa ufia'w akwamba? A'i waf afamba magaila mu'uli God nagaso' Mosesani? Owa'atin endilisi! Waf magahapifa Jisasafi atef fahefa ufia'w akwamba. \*

---

\* **3:22** Ro 3:9, 5:2    \* **3:23** Ro 5:1; Ef 2:8    \* **3:24** Ef 1:7    \* **3:26**

1 Ko 1:31    \* **3:27** Ga 2:16

**28** Ea' apa' mogawa epes mamahisa sagahapifa Jisas atini, God na'i esis atis sataga bo'wes hilili', apa' esis sanda' maola sogaila mu'uli inimbai, owa'atin.\*

**29** Dei' mama? A'i God anen Dembinai esis Judai atona? Owa'atin. Anen esis isimba owa' Judaisia wapani. \*

**30** Dei' main, God anen ea' anamba atona. Anen na'i basef atifif fafe'ma epes hiasi. Epes ami sogahapifa Krais Jisasi, atiasi God ni'i esis isimba bo'wes hilili'i, esis Juda saloma isimba owa' Judaisia wapani.

**31** Isimba atis dei' hapif inimba apa' ina mi'i apa' mapa'aga mu'uli inimba God nagaso' Mosesani, owa'atin endilisi! Apa' mahapifa Krais Jisas dei' mawalapa basef kofagefa ma mu'uli inimba.

## 4

*God na'i Abraham nahapifana endilisi dei' nataga bo'ona hilili'*

**1** Apa' mi'i basefa Abraham akunamapa apa' Judai mi'imama? Anen nanda' maina God naga'i anen bu'unai?

**2** I'i Abraham a' endilisi ma nonda' maol bu'wani ma dei' nagataga aman bo'ona hilili'ai, dao' anen a' nondagala nosa'ma agol ananigili atogol lu'wagol. Apa' naep Godi owa'. \*

**3** Baibel na'ias na'imama? Naga'ias na'amba na'i, "Abraham nahapifa God ea' okom mandanda'ma hapif inimba na'i anen bo'ona hilili!."\*

---

\* **3:28** Ro 10:12    \* **3:29** Diu 6:4; Ro 4:11-12; Ga 3:20    \* **3:30** Mt 5:17; Ro 8:4    \* **4:2** Jen 15:6; Ga 3:6; Je 2:23    \* **4:3** Ro 11:6

**4** Apa' mogawa epes sanda' maoli ma sogofa' hiahawesa maoli, hiahawes isimba ina mi'ias mi'i mogofa'as dowaf si'i preseni, owa'atin. Isimba hiahawes sagatopa' maolasi atis.

**5** Apa' God ina nati maol bu'wani epes sanda'ani ma nigal'i esis bu'wasi, owa'atin. Anen nati epen mamahina nagahapifana la'ifinai ma nogofala epes sanda' waf awafii bo'wes hilili'i. Ea' God okom mandanda'ma okom epeni maga'i endilisi atis epen inimbai dei' na'i anin bo'wen hilili'i.

**6** Fowa' Devit wapani nanda' anif basef fail buk Baibela epes mamahisa God natilis naga'i bo'wes hilili'i, isimba a sandagala. Esis ina sanda' maol, owa'. Sahapifana atin dei' na'i esis bo'wes hilili'. \*

**7** Devit nanda' basef ifimba na'i,  
"Epes ami God nagakwaha waf awafi asasifi  
okom magaso'anafi ma nagaofana awami  
asasimi, epes isimba sonahas."

**8** Epes ami Dembinai owa' okom mopoma waf awafi asasifia, isimba sonahas."\*\*

**9** Epes isimba Devit na'i sonagahasi, epes isimba sagatopa' alopi atis? Owa'atin. Isimba owa' sogatopa' alopi wapani. Dei' main, doko' ae' a'ipipa Baibel naga'i na'amba na'i, "Abraham na-hapifa God, ea' God okom mandanda' ma hapif inimba na'i anen bo'ona hilili'."

**10** Dei' Abraham nepe si'i maina God okom mapomana naga'i aman bu'unai hilili'i? Anen nali' natopa' alop ea' a'a ata' owa' ata' notopa' alop? Anen ina dei' natopa' alop God naga'i anen bo'ona hilili'i, ata' owa'atin. \*

---

\* **4:6** Sam 32:1-2   \* **4:8** Ro 4:3   \* **4:10** Jen 17:10-11

**11** Fowa' Abraham nali' nahapifa Godnofalana  
epen bu'unai hilili'i. Ama main, nagi' natopa'  
alop. Waf afamba nagatopa' alopafi anol ametal  
God nihimba'mana na'amba na'i nemaf afamba  
ata' owa' notopa' alopa, a' na'i anen aman  
bu'unai nagahapifa Godi. Isimba atis dei' anen  
nataga akunama epes hiasi nagahapifa Godi owa'  
sogatopa' alopia. Esis sahapifa God atin, nofalas  
epes bu'wasi.\*

**12** Ea' anen akunama epes isimba Juda sagatopa'  
alopi wapani. Apa' esis ina satopa' alop atop,  
owa'. Esis sagi'ma bo'wagah Abrahami sahapifa  
God si'i fowa' anen nagahapifana nogota atamba  
ata' owa' nogatopa' alopa.\*

### *Basef God nagala' lapafi ma epes hiasi sagahapi-fanai*

**13** Fowa' gani God na'i basef nala' lap nagaloma  
Abraham na'i, "Ae' anaf ese'ena itap hiagoma ina'  
neloma esis bafasena akusena ine'isi wapani."

Apa' Abraham ina naila mu'uli anaf God no-gaso'  
Mosesani ma dei' God nala' lap nalomana  
naga'ipana basef ifimba, ata' owa'atin. Abraham  
nali' nahapifa God dei' nofalana aman bo'ona  
hilili'i na'ipana basef ifimba.\*

**14** Anif basef fatopalopa ifimba fagali'i na'amba  
fa'i, I'i epes sagaila mu'uli mamahina Godi ma  
sofa' hiahaom amamba God nogaso'asamiae atiasi  
waf afamba mogahapifa Godafi a' fenalo ea' basef

---

\* **4:11** Mt 3:9      \* **4:12** Jen 17:4-6; Jen 22:17-18; Ga 3:29      \* **4:13**  
Ga 3:18

ifimba lapafi Godi wapani a' owa' banagefa, ea'  
owa'atin.\*

<sup>15</sup> Dei' main, mu'uli inimba nigihimba'mapa  
okom numbutimi Godi ma nogaso'as akafimi  
isimba sogasambala mu'uli inimbai. I'i apa' owa'  
mila basefa mu'uli inimbaia, God okom wanda-  
funa nopomapa. I'i mu'uli inimba owa'ai, God  
ina a' ni'i epes sumbisila' mu'uli inimba satopa'an,  
owa'atin.\*

<sup>16</sup> Abraham nahapifa God. Isimba atis dei'  
God na'ipana basef ifimba lapafi bu'wafi ma apa'  
mogogawa endilisi God na'ipas basef ifimba  
wapani na'i apa' hiapai bafapa Abrahami,  
naso'apaef dowaf si'i presen. Ina naso'asef  
epes isimba sagaila mu'uli inimba atini, owa'.  
Epes mamahisa sagahapifa God na'amba atin  
si'i Abrahami, esis wapani. Anen nali' nahapifa  
God nataga bafamapa nali' naumb nagali'i ma  
apa' hiapai mamahepama dei' magi' magahapifa  
Godi.\*

<sup>17</sup> Si'i Baibel naga'i, God fowa' na'ipa Abraham  
naga'i, "Ae' enda'ena nepe bafama isimba misi'ah  
epes hiasii."

Abraham anen bafamapa ape'inai ma naep  
Godi. Anen nahapifa God atona nagaso'asa ambal  
namili epes sagaga'ii, a nogofala hiahawes hiasi  
ata' owa' sogatagaia si'i sataga sagape ea'i.\*

<sup>18</sup> Abraham ina dei' nati hiahawes isimba God  
na'ipanas ea' na'i nondasi. Apa' owa', anen  
nahapilif endilisi si'i nagatilis ea'i. Isimba atis

---

\* **4:14** Ro 3:20, 5:13; Ro 7:8    \* **4:15** Ga 3:7    \* **4:16** Jen 17:5; Ais  
48:13    \* **4:17** Hi 11:1; Jen 15:5

dei' nataga "Bafama esis amam nematawa misi'ah hiasi."

Si'i fowa' God na'ias ea' naga'i, "Owagama esis mini'ap wambota ine'isi sogataga na'amba."\*

**19-20** Abraham hagona ea' felefele'ma afagof 100-pelaiguf alop ananipi a' pala'of si'i nagaga'i. Ea' waulu'mana Sera a' hage'w wapani asa'w ina la'ifi'wa kogola awasi, owa'. Abraham okom mapoma isimba, apa' okom ananimi banagami nogogawa God endilisi ina mowala, owa'atin. Anen nahapifa God banagambela basef God nagala' lapafi ma hiahawes anaf sigi' sogatagai. Hapif atin nanda'ana banagona ea' nafela agol Godi lu'wagol.

**21** Anen nahapifa God endilisi ma nogogawa anen la'ifnai ma nonda'as na'amba si'i fowa' na'i nonda'asa basef ifimba nagala' lapafi. \*

**22** Isimba atis dei' God a' okom mapoma hapif ananini ea' na'i, "Anen epen bo'ona hilili'i."

**23** Fowa' amom profet manda' basef ifimba fagape Baibeli faga'i na'amba fa'i, "God okom mapoma anen epen bo'ona hilili'i."

Amom ina manda' basef ifimba ma Abraham atona, owa'atin. \*

**24** Manda'efa apa' wapani. Apa' mahapifa God nasa'ma Jisas dembinai ape'inai nogosafel matmati. Isimba atis atiasi God okom mondanda'ma hapif ape'ini a' ni'i apa' be'epa hilili'i. \*

**25** God nasapa' Jisas nafi'i naga'ma nagakwaha waf awafi ape'ifi. Ea' nasa'mana matmata noga'i apa' amam nematawa be'epa hilili'i.

---

\* **4:18** Jen 17:17    \* **4:21** Jen 15:6    \* **4:23** Ro 15:4; 1 Pi 1:21

\* **4:24** Ais 53:4-5; 1 Ko 15:17

## 5

*God na'i apa' amam nematawa be'epa hilili'i*

<sup>1</sup> Basef kofagefa fape fagali'i ifimba, hapif ape'ini atin dei' Godnofalapa epes be'epa hilili'i. Isimba atis dei' Dembinai ape'inai Jisas Krais nanda'apa mape opalef atelef awanelef maloma God. \*

<sup>2</sup> Anen atona uchia'wa apa' mahapifana mogape nomona okom Godi magamagaila apa' a'owa'i, natopalopapa dowaf nambemapai dei' magape andeande'mami. Apa' mogawa endilisi mape mohafa anaf God nofa'apa mope molomana mugati mogogala'i ananimi. Hapif inimba nanda'apa sonahapa ma amamba. \*

<sup>3</sup> Apa' ina sonahapama amamba atom, owa'atin. Apa' sonahapama nimanimi mogatagamapa wapani. Dei' main, apa' mogawa mofa'ama mogowa' banagapa wapani.

<sup>4</sup> I'i apa' mulutu banagepama gwamba, God niga'i aho'mapai. Isimba atis dei' apa' mogawa endilisi anen nigaila basef ananifi datimai ma notopalopapa mope mogohafa' mogogala'i banagami ananimi anaf mogatagai. \*

<sup>5</sup> I'i apa' mogawa endilisi na'amba, gawa ape'ini ina atiasi nenalo, owa'. Dei' main, God naso'apa Ambal bu'unai Ananinai ea' waf okom magamagailapafi fape lu'ufa opalef ape'ilifi.

<sup>6</sup> Fowa' apa' ina banagepa ma monda' waf bu'wafi, owa', nogota atamba God nandandepata ea'i, Krais naga'ma apa' mogowa' alafugaha Godi.

---

\* <sup>5:1</sup> Ro 3:24,28, 4:24; Ef 2:18, 3:12   \* <sup>5:2</sup> Je 1:2-3; 1 Pi 1:5-7   \* <sup>5:4</sup> Sam 22:5, 25:20; Hi 6:18-19

**7** Ipa' ukup pandanda' pa'imama? Anin open na'i nega'ma negatopalopa open ami na'i nigaila mu'uli Godi, a'a owa'? A'i atiasi ina anis si'i aho', owa'atin. Apa' i'i anin open bo'wen hilili'i, dao' anin ila ma nega' negatopalopa open inimba bu'wani.\*

**8** Apa' ata' manda' waf awafi atin, Krais naga' natopalopapa. Ea' dei' God nihimba'mapa okom lu'unai naganagaila ape'i nandawalap. Krais a nikila' open inimba bo'wen hilili'i naga' natopalopapa.\*

**9** Anen naga' esimbhel ananimbeli balo dei' Godnofalapa amam nematawa be'epa hilili'i. Isimba atis dei' apa' a' mogawa endilisi atis Krais natag-wahepa ma okom wandafunai Godi. \*

**10** Fowa' apa' ata' mape boupai Godi, owa' dei' nanda'apa mataga alipipai ananipai opalef atifilif malomana. Anen nanda'as na'amba ma Nogamana ananinai nagaga'ma apa'. Isimba atis dei' apa' mape alipipai Godi mogawa endilisi Krais nepe namona ma dei' motanima molomana sisihipa mogape.

**11** Apa' ina isimba atis, owa'. Apa' mondagala ma God. Dei' main? Fowa' apa' boupai ma anen apa' dei' Dembinai ape'inai Jisas Krais nali'amona naumbih ape'imi nanda'apa mataga alipipai malomana. Ea' dei' sonahapama anen.\*

*Adam nawalapai ga', apa' Jisas nawalapa ambal namili*

\* **5:7** Jo 3:16; 1 Jo 4:10      \* **5:8** Ro 1:18, 2:5,8      \* **5:9** Ro 8:7-8

\* **5:11** Jen 2:17; Jen 3:6,19; Ro 6:23

<sup>12</sup> Apa' mogawa isimba. Aman atotona nali' nanda' waf awafi, dei' waf awafi fape neleemb amam nematawa itapasi. Ea' dei' waf awafi fahokolai ga' nafi'i, dei' ga' nefo' epes hiasi hi'alas saga'. Dei' main, epes hiasi ea' sanda' waf awafi hi'alas. \*

<sup>13</sup> Fowa' gani nogota atamba God ata' owa' noso'anai mu'uli ananini Mosesa, waf awafi fali' fataga fape itap ana'e. Apa' i'i basefa mu'uli inimba owa'atinai, dei' God ina a' nowaloga epesa waf awafi asasifi, owa'atin. \*

<sup>14</sup> Apa' ga' nataga nape nogota atamba Adami nafi'i nataga nogota Mosesi. Epes isimba hiasi ina sogawa mu'uli God nagaso' Mosesani, owa'atin. Apa' owa' ga' nahapilas sisihis hi'alas. Fowa' God naso'ana mu'uli ananini Adam, owa' Adam natolapan. Anis epes daisa ina sumbisila'an si'i Adam nagatolapan, owa'. Apa' ga' nahapilas wapani. Aman anamba Adam nondola'waifa aman anamba Dembinai atona nigi' nogatagai.

<sup>15</sup> Waf God nagatopalopapa dowafafi ma Jisas Kraisi faloma waf awafi Adam nanda'afi, ina na'amba atin, owa'atin endilisi. Aman anamba Adam atotona nanda' waf awafi, dei' nanda' epes hiasi saga'. Apa' God nagatopalopapa dowafi, amamba mataga lu'um a'owa' ma aman atotona Jisas Krais. Ea' apa' dei' mofa' hiahawes isimba presen Godi nikila' ga' inimba ea' nataga lu'una a'owa' ma nagatopalopa epes hiasi.

<sup>16</sup> Waf bu'wafi God nagatopalopapa dowafafi afamba ina fape atogon faloma waf awafi aman

\* **5:12** Ro 4:15    \* **5:13** 1 Ko 15:21-22; 1 Ko 15:45

anamba atotona nanda'afi, owa'atin endilisi. Aman anamba nanda' waf atetef awafi. Ea' God nawaloga apa' epes hiapai na'i, "Ipa' awepa hi'alepa a'owa!".

Apa' manda' waf awafi hiafi apa' God okom maimailapa natopalopapa dowaf ea' na'i apa' epes be'epa hilili'i.

<sup>17</sup> Aman anamba atotona nanda' waf awafi. Isimba atis dei' ga' nesafel nowalo' epes hiasi hi'alasa anen atona. Apa' maol aman anamba atotona Jisas Kraisi a' lu'win banagen a'owa' nikila' ga' ma nagatopalopa epes mamahisa God natopalopas dowafa sogofa'waf usi'ifi hilili'i, epes isimba atiasi sope namissa sogape dembesi.\*

<sup>18</sup> Dei' apa' magape na'amba. Fowa' waf awafi atetef fanda' apa' hiapai higilalapa hi'alapa. Ea' na'amba atin waf usi'ifi atetef fatagwahepa ma waf awafi fanda'apa dei' mape namepa. \*

<sup>19</sup> Aman atotona nosambala basef Godi dei' apa' hiapai mape manda' waf awafi. Ea' na'amba atin aman bu'unai atotona naila basef ifimba, dei' apa' hiapai motaga usi'ipa hilili' ma naep Godi. \*

<sup>20</sup> Ama main, mu'uli inimba God nogaso' Mosesani natagama esis sogogawa waf asasifi awafi sagatopa' mu'uli inimba. Apa' esis ina sakwaha waf afamba awafi, owa'atin. Sanda'af hiafi a'owa'. Apa' owa', ufia'w God nagatopalopa esisa'w dowafi kwataga lu'ukw a'owa' ma esis. \*

<sup>21</sup> Fowa' waf awafi fataga fape ilifa apa' hiapai dei' maga'. Apa' dei' waf God nagatopalopapa

\* **5:17** 1 Ko 15:22

\* **5:18** Ais 53:11

\* **5:19** Ro 4:15; Ga 3:19

\* **5:20** Ro 6:23

dowafafi fape ilif a'owa' fikila'. Anen natopalopapa ea'nofalapa amam nematawa usi'ipa hilili'i ma mogofa' ambal namili lagape liflafi dondoli ma dembinai ape'inai Jisas Krais.

## 6

*Apa' maga' ea' ma waf awafi, owa' Krais natopalopapa mataga wahifipa*

<sup>1</sup> Ea' dei' apa' monda' basef maif wapani? Apa' mondanda' waf awafi atapipa ma atiasi waf God nogatopalopapa dowafafi fegataga lu'wif a'owa'? Apa' mi'ias na'amba a'a owa'? \*

<sup>2</sup> Owa'atin endilisi! Waf awafi atef, dei' apa' maga' ea'. Dei' maina apa' ata' magafe' waf afambai awafi atef? Owa'atin, hapaifi. \*

<sup>3</sup> Ipa' pegawa apa' mamahepama mogofa' sa'ofa magape mandaloma sisihipama Krais Jisasi ea' mofa' sa'of maloma ga' ananini. \*

<sup>4</sup> Sa'of inimba apa' mandaloma sisihipa maloma ga' Jisasi, God nawapa maloma Krais matmat. Banagami fasimi ahamanai atom masa'ma Krais nosafel matmat. Ea' na'amba atina apa' mosafel wapani mape banagepa mogafe' waf dambaifi ma ambal namili itap apa'e.\*

*Apa' dei' mape namepa maloma Krais ea' anaf mosafel wapani molomana*

<sup>5</sup> Apa' mandaloma endilisi tatala'ipa maloma anona ga' inimba ananini si'i anen nagaga!. Ea'

---

\* **6:1** Ro 3:5-8; 1 Pi 4:1    \* **6:2** Ga 3:27    \* **6:3** Kl 2:12    \* **6:4** Fl 3:10-11

na'amba atin anaf mondaloma tatala'ipa mosafel wapani molomana. \*

<sup>6</sup> Apa' mogawa opalef apimi ape'imi amamba maga' mail lawag usi'igai ti'wanaegai maloma Krais ea' God natalogofa banagami waf aunai manda' maol magape alop ape'ipii. Isimba atis dei' waf awafi ina fawasi'apa sisihipa wapani, owa!. \*

<sup>7</sup> Dei' main, anona aman nagaga'i, waf awafi ina ata' fahapilana sisihina wapani, owa!.

<sup>8</sup> Aho', apa' maga' maloma Krais. Ea' mogawa endilisi attiasi mope ambal namili molomana wapani.

<sup>9</sup> Apa' mogawa God nasa'ma Krais nosafel matmat ea'. Isimba atis anen ina attiasi noga' wapani, owa!. Ga' ina banagen a'owa' negatalogofa anen, owa'atin. \*

<sup>10</sup> Anen naga' atetef ea' ma'um. Ga' inimba atin anen nahambombaga banagami amamba waf awafi mowala hi'alam. Anen dei' nape ambal namili naila okom Godi atom. \*

<sup>11</sup> Ea' na'amba atina ipa' wapani a' ukup pendapoma ipa' atipa paga' ea' pakwaha waf awafi si'i sagaga'i. Ipa' ukup pendapoma ipa' ea' pape sisihipa paloma Krais Jisas pape namipa paloma God. \*

<sup>12</sup> Ipa' ina pi'i aho'ma waf awafi fepe fetaga banagef femafi ipa', owa'i. Na'amba waf afamba awafi fehende'epa a pila waf alop atopafi. \*

---

\* **6:5** Ga 5:24   \* **6:6** 1 Pi 4:1   \* **6:9** Hi 9:26-28; 1 Pi 3:18   \* **6:10**  
2 Ko 5:15; Ga 2:19; 1 Pi 2:24   \* **6:11** Jen 4:7   \* **6:12** Ro 12:1; Ef  
2:5, 5:14

**13** Ipa' ina peso' lagof bo'wagah ipe'isi sefe'ma penda' waf awafi, owa'i. Pendaso'anas God atona soloma nomonas ukup ipe'isi hi'indalasa anen atona si'i epes sotanima sogosafel matmat wapani sagape namis. Ea' ipa' pese'ana alop du'wa'wanipi hi'indalapa Goda penda' waf usi'ifi.  
\*

**14** Ipa' pegawa waf aunai ina ata' nope lu'unama ipa' wapani, owa'i. Dei' main, ipa' dei' ina ata' pape lafela mu'uli inimba God nagaso' Mosesani ma pigailan, owa'atin. Ipa' apape lafela ufia'w Godi ato'w okom maimailapa ma nagatopalopapa dowaf.\*

### *Apa' dei' mape manda' maola waf usi'ifi*

**15** Ea' dei' apa' ata' monda'as mi'imama? Apa' ina mape lafela mu'uli inimba God nagaso' Mosesani, owa'atin. Apa' dei' mape lafela ufia'w akwamba God nagatopalopapa dowafa'wi. Ea' dei' apa' monda' waf awafi a'a owa'? Owa'atin endilisi! \*

**16** I'i ipa' peso' ipa' atipa penda' maol pepe lafela aman ami, ipa' pape sisihipama anen atona. I'i ipa' peso' opalefa waf awafi, ipa' pape lafela waf afamba fawasi'ipa sisihipa paga'. Apa' i'i ipa' peso' opalefa waf bu'wafi, dao' pape lafela God pataga usi'ipa hilili' ma naep ananipi.

**17** Endilisi, fowa' ipa' pape lafela waf awafi fawasi'ipa sisihipa. Owa' God nanda'epa pape lafela basef ananifi pailif ea' paso'ana ukup

---

\* **6:13** 1 Jo 3:6    \* **6:14** Ro 6:1    \* **6:15** Jo 8:34; 2 Pi 2:19

nelelemb hi'alasa pagaila basef ifimba endilisifi ipa' pigalafafi. Ea' apa' mundanifela God. \*

<sup>18</sup> Anen natagwahipa ma banagami waf awafi, dei' pataga epes panda' maol pape lafela waf usi'ifi fawasi'ipa sisihipa.

<sup>19</sup> Ukup ipe'ipi ina dei' banagep, owa'. Isimba atis dei' aila ukup apa' epesi a'ias alihis a'i. Fowa' ipa' ata' paso' alop ipe'ipi du'wa'wanip pape lafela waf awasif alugufi faloma waf hiafi sogosambala mu'uliefi ea' fawasi'ipa sisihipa. Apa' dei' peso' alop wa'awa'api hi'ilap pondafe'ma waf usi'ifi fi-wasi'ipa sisihipa ma pegape Godi atipa si'ipa.

<sup>20</sup> Fowa' ipa' ata' pape lafela waf awafi fawasi'ipa sisihipa ea' nogota atamba ipa' ata' pape pelelama waf usi'ifi. \*

<sup>21</sup> Ipa' pefa' hiahawes mais fasisi ma waf awafi fowa' panda'afi, ma dei' ipa' ambagof awagufafi? Owa'atin. Waf afambai fagawalapai ga' atini.

<sup>22</sup> Owa' dei' God natagwahipa ea' ma waf awafi nanda'epa pape panda' maola anen pape lafelana atapipa. Maol inimba atiasi netaga nela gwa'aisi isimba. Ipa' pepe be'epa hilili' ananipai atipa ma pegefa' ambal namili andeande' dondol liflafi. \*

<sup>23</sup> Waf awafi fagwamasa awami ma isimba sanda' maola waf awafii. Awami amamba. Esis atiasi soga' atin higililas. Apa' God dei' naso'apai presen fasini dowaf, inimba ambal namili lagape dondoli ma mope sisihipa mogoloma Krais Jisas.

## 7

---

\* **6:17** Jo 8:32    \* **6:20** Ro 7:5, 8:6,13    \* **6:22** Ro 5:12,15

*Basefwaminifatina waf sandaso' amafi fa'ipapa dei' manda' maola waf bu'wafi ma opaf dambaifi*

<sup>1</sup> Ipa' alipipai, ipa' pegawa mu'uli ma waf daso'amaifi ea'. Ea' pegawa andeande'ma basef ifimba dei' iga'ipipafi. Nogota atamba epen ata' nagape namin, anin ata' nepe lafela mu'uli inimba.

<sup>2</sup> Basef kofagefa ma mu'uli inimba ifimba. I'i ano'w nemata'w kwagaso' amani, ma anen ata' nogape namona, mu'uli inimba ata' newa'ana naloma ako'w ata' sape sisihis. Apa' i'i waulunama'w nogaga', dao' mu'uli inimba nagahapilasi pele'atan kwape wahifi'w.

<sup>3</sup> Ea' i'i anen aman ata' nope ambal lapaona ma waulu'mana kofe' kogaso' anona aman daiana, ea' sofala'w si'i ako'w kwanda' waf awafi so'a waola anona aman daianai. Apa' i'i aman akwa'unai nogaga', mu'uli inimba ina ata' nahapilas sisihis wapani, a' owa'. Ako'w kwandatagwah kwape wahifi'w. Esis ina si'i basefa ako'w si'i ako'w kwanda' so'a wauli, owa'atin.\*

<sup>4</sup> Ipa' alipipai ae'ipai, ae' a'i i'ipipa basef ifimba kofagefa. Apa' hiapai mape sisihipa maloma Krais ea' isimba atis dei' maga' ea'. Dei' mu'uli inimba God nagaso' Mosesani ina ata' nahapilapa sisihipa wapani, a' owa'. Apa' ea' mape sisihipama anona aman God naso'mana nogosafel matmat wapanii ea' monda' maol ananini atin. \*

<sup>5</sup> Fowa' ata' magape atapipa opalef apimi, mu'uli inimba nafilai ukup awami ma alop

\* **7:3** Ro 6:2,11; Ga 2:19    \* **7:4** Ro 6:21

ape'ipi. Ea' manda' maola waf awafi fataga ma ga' atin. \*

**6** Apa' dei' maga' maloma Krais makwaha hia-haom magahapilapa sisihipai. Ea' mu'uli inimba ina ata' newa'apa wapani, owa'atin. Mape wahifipa. Dei' apa' ina ata' manda' maol maila mu'uli inimba amom manda'an nagail buki, owa'atin. Apa' manda' maola waf dambaifi Ambal bu'unai Godi nanda'afi.\*

### *Waf awafi fahambombaga apa'*

**7** Dei' apa' ata' mi'ias mi'imama? Mi'i mu'uli atin waf awafini a'a owa'? Owa'atin endilisi! Mu'uli inimba God nagaso' Mosesani nihimba'me waf maif awafi kofagefa ma egegawaf. Waf afamba kowagalasafi fagape na'amba. Mu'uli inimba naga'ias na'amba na'i, "Ina kowolena ma anis hiahawes anona amani, owa'i."

I'i mu'uli inimba owa' nihimba'me na'ambaea, ae' ina egawa waf awafi kowagalasafi. Apa' owa', owa'atin.\*

**8** Mu'uli inimba si'i ano'w ufia'wa waf awafi faga'sa'mai okom naninani nanda' ae' kowagalema hiahaom hiami. Apa' mu'uli inimba owa'atinai, waf awafi si'i fagaga'i atef. \*

**9-10** Fowa' gani mu'uli inimba ata' owa', nogota atamba ata' ape okom mase'e elelama waf awafi. A'i owa' main owa', basef kofagefa ma mu'uli inimba fafi'mai ae' ea' waf awafi fesafel fafe' ambal ae'ali ea' fahe aga'ma mu'uli inimba. Doko' li' God nanda' mu'uli ananini ma nogase'e ambal namili

\* **7:5** Ro 8:2, 6:4   \* **7:6** Eks 20:17; Diu 5:21   \* **7:7** Ro 4:15   \* **7:8**  
Je 1:15; Lev 18:5; Ro 10:5

owa', ae' ina' efa' ambal namilima mu'uli inimbai,  
owa'. Anin nahe andaga' atin. \*

<sup>11</sup> Dei' main, waf awafi fasopama ufia'wa mu'uli  
inimba ea' fambaso'me. Mu'uli inimba nasa'ma  
okoma ae' nihimba'me waf awafi fahe aga'. \*

<sup>12</sup> Ea' apa' mogawa mu'uli atin, anin bo'wen  
hilili'i. Basef ifimba hiafi fagape mu'uli inimbai  
wapani be'ef hilili'i.\*

<sup>13</sup> Dei' a' main wapani? A'i mu'uli inimba fasini  
nahe aga'? Owa'atin endilisi! Waf awafi atef  
fahe aga'. Apa' hiahawes isimba si'i ano'w ufia'wa  
waf awafi fahe agaga'i ma waf afamba awafi  
kofagefa fetaga fendawalap. Ea' mu'uli inimba  
nihimba'mapa waf awafi kofagefa, afamba ea'  
awef endilisi a'owa!. \*

### *Waf awafi fala'ata ukup ape'ipi*

<sup>14</sup> Apa' mogawa mu'uli inimba nafi'i Ambal  
bu'unai Godi nihimba'mapa okom ananimi. Apa'  
ae' okom apinai nape ina aila okom Godi, owa'.  
Waf awafi fala'atae anda' maola waf anamba au-  
nai. \*

<sup>15</sup> Apa' dei' ae' ina egawa waf kofagefa anda'afi,  
owa'. Waf ae' okom ma'ima'iaf a'i enda'afi,  
afamba ina anda'af, owa'.

<sup>16</sup> Okom ae'ami atom a'ias na'amba a'i aho'ma  
mu'uli inimba bu'wani ma eme'an igailan. Apa'  
owa', owa'atin. Ina ailan, owa'. Atolapan anda'  
waf awafi andaiwa'ma enda'afi.

---

\* **7:9-10** Jen 3:13; Hi 3:13 \* **7:11** 1 Ti 1:8 \* **7:12** Ro 5:20 \* **7:13**  
Sam 51:5; Jo 3:6 \* **7:14** Ga 5:17

**17** Apa' ina ae' atowe anda'an, owa'. Waf au-nai nagape okom ae'anai nomoni, anamba atona nanda'am. \*

**18** Ae' egawa okom ae'anai nomon, ina anom nomonas bu'wami mape, owa'. Opaf anamba apinai ae'anai atona nahambombage. Endilisi, ae' okom ma'i enda' waf fasifi atef, apa' owa'. Ina la'ifiwi anda'af, owa'.

**19-20** Aho', waf fasifi okom ma'i enda'afi, afamba ina anda'af, owa'atin. Apa' waf awafi andaiwa'ma enda'afi, afamba atef anda'af. Ea' ae' egawa ina ae' ela okom anda' amamba, owa'atin. Waf awafi fagape opaf ae' nomoni, afamba atef fanda'e anda'am.

**21** Isimba atis dei' ati waf na'ambaifi fape ae'. Okom ma'i enda' waf fasifi, apa' waf awafi fagape nomonas ae'ami anda'af.

**22** Endilisi okom ae'ami ma'ima'i mu'uli inimba God nagaso' Mosesani a'owa' andagalaman. \*

**23** Apa' owa', ati anef waf daiaf fape alop si'ip wa'awa'ap ae'api nomon. Ea' waf afamba fapa' faloma mu'uli inimba nagape okom ae'amii. Waf afamba atef fagape alop wa'awa'ap ae'apii fala'atae fanda'e anda' maola waf afamba awafi.

**24** Ea' owhipiwi! Ae' epen dagala akai, okom nimanimiwai. Atiasi ami netagwahowe ma opaf apinai dei' nahe agaga'i? \*

**25** Owa', ae' anifela God! Anen atona nanda' Jisas Krais Dembinai ape'inai natagwahowe ape wahifiwi.

Dei' ape na'amba. Okom ae'ami atom, ape lafela mu'uli inimba, apa' opaf apinai ape lafela

\* **7:17** Jen 6:5, 8:21    \* **7:22** Ga 5:17; Je 4:1; 1 Pi 2:11    \* **7:24** 1 Ko

15:57

banagami waf awafii.

## 8

*Krais nakwahomapa waf awafi ea' naso'apa  
Ambal bu'unai Godi apa'*

<sup>1</sup> Basef ifimba fagali'i kofagefa ifimba. Apa' amam nematawa mape sisihipa magaloma Krais Jisasi, ina ata' anif basef dei' ma God nonda'mapa kota basef lu'wafi mogofa' akafimi ma waf awafi apa' manda'afi, owa'atin. \*

<sup>2</sup> Dei' main, banagami Ambal bu'unai Godi nagaso'apa ambal namili ape'i, anen natagwahepa ma banagami waf awafii maloma banagami ga'i. Anen nanda'am na'amba ma Krais Jisas atona ea' mape sisihipama anen dei' mape wahifipa. \*

<sup>3</sup> Maol mamahina mu'uli inimba God nagaso' Mosesani owa' banagena nenda'ania, God nanda'an. Dei' main, opalef apa' epesi pupulim, owa' banagema. Dei' God nanda' maol inimba na'amba. Nasapa'i Nogamana ananinai atona nafi'i nataga si'i apa' epes manda' waf awafi. Ama nokwahomapa waf awafi hi'ilaf okom mogaso'anaf dogw. Anen nafi'ima nogokwaha waf awafi apa' epesi feloma akafimi ma waf afamba ea' God naso'anam mapoma anen atona. \*

<sup>4</sup> Anen nanda'am na'amba ma apa' mofe' mogaila waf be'ef usi'ifi fagape mu'uli inimbai. Dei' main, apa' dei' ina mafe' maila fe' inimba opalef

---

\* **8:1** Ro 7:23-24   \* **8:2** Ap 13:38, 15:10; Fl 2:7; Hi 4:15   \* **8:3** Ga 5:16,25

apilifi, owa'. Mafe' maila fe' dambaini Ambal Godi.

<sup>5</sup> Epes sagaila waf opalef apilifi sagafi'i, ukup asasipi pafe' talala' paila hiahaom amamba opalef apilifi fagafagailami. Apa' epes ami safe' sagaila Ambal bu'unai Godii, ukup asasipi pafe' talala' paila hiahaom okom Ambal bu'winai naga'iami atom. \*

<sup>6</sup> I'i ukup epes isimbai pepoma hiahaom awami ma nelelemb apimi asasimi atom, amamba mawalapai ga' higiligalasani. Apa' open ami nomonas ananisi sisihis sogapoma hiahawes Spirit Ambal Godi, open inimba dei' nape ambal namili opaf fape awanef. \*

<sup>7</sup> Epes mamahisa ukup pigaila waf opalef apimii, isimba sataga bousi Godi. Dei' main, esis ina sape lafela mu'uli hiani Godi, owa'. Ina banagesa sigaila mu'uli inimba, owa'atin.

<sup>8</sup> Epes mamahisa sagape lafela waf opalef apilifi, epes isimba ina la'ifisa sonda' waf God okom maga'iafi, owa'atin. \*

<sup>9</sup> Apa' i'i endilisi Ambal bu'unai Godi nupaipa, ipa' ina ata' pape lafela waf afamba apifi awafi ma nembel apinai, owa'. Ipa' pape lafela waf Ambal bu'unaii. Apa' open ami Spirit Ambal Kraisi owa' nope anina, inimba ina open Kraisi, owa'. \*

<sup>10</sup> Waf awafi faha alop ipe'ipi ma atiasi pogaga'. Apa' i'i Krais nogape nomona ipa', Ambal ananini nondae'pa pepe nampia.

<sup>11</sup> Fowa' God nasa'ma Jisas notanima nosafel

\* **8:5** Ro 6:21    \* **8:6** Mt 12:34; Jo 8:43, 12:39; Je 4:4    \* **8:8** 1 Ko 3:16, 12:3    \* **8:9** Ga 2:20; Ef 3:17; 1 Pi 4:6

wandof. Ea' Ambal ananinai natopalopepa na'amba. Ipa' epes mamahipama Ambal bu'unai Godi nupaipa nomon, dao' a' nese'epa ambal namili alop ipe'ipi wapani. Ipa' pagaga' ea'i apa' owa', dei' anen nanda'epa pape namipa.

*Ambal bu'unai Godi nanda'apa mataga awasi ananipai*

<sup>12</sup> Ipa' alipipai ma wambota Kraisi, anif basef fagi'ma ifimba fa'i Krais natalepa ma maol lu'wani dei' apa' anof wiaf ata' fotaomapa ma mugaila okom Ambal bu'unai Godi. Apa' wiaf akapa ma mofe' mugaila opaf anamba apinai, owa'. \*

<sup>13</sup> I'i ipa' pefe' pigaila waf afamba opaf apinaima, anaf apeg'a'. Apa' i'i ipa' peha waf awafi ipe'ifi fega' ma banagami Ambal bu'unai Godi, dao' anaf apepe namipa.

<sup>14</sup> Epes ami sagaila wafa Ambal bu'unai Godi, isimba dei' sape awasi Godi wambota ananisi. \*

<sup>15</sup> Dei' main, ipa' ina pefa' Ambal bu'unai Godi nahapilipa sisihipa si'i sanda' kalabusi ma ata' ombel mogahепа wapani, owa'atin. Ipa' apefa' Ambal bu'unai anamba nanda'epa pataga awasi Godi. Banagami Ambal bu'unai atom dei' mofalana ma'i, "Ahamapa! Ahamapa!" \*

<sup>16</sup> Ambal bu'unai Godi atona nepe sisihina apa' natopalopa ambagof ape'igufi ea' dei' mawalapa basef ma'if alihif, mape awasi Godi. \*

<sup>17</sup> Apa' magape awasi Godii. Ea' anaf mofa' hiahaom Ahamapai moloma hiahaom anen

---

\* **8:12** Ga 6:8; Kl 3:5    \* **8:14** 2 Ti 1:7; Mk 14:36    \* **8:15** 2 Ko 1:22

\* **8:16** Ga 4:5-7; Re 21:7

nambe'ama Krais nugumafiami, mofa'am moloma Krais. I'i dei' apa' mofa' akafimi mogalomanama, anaf mofa' poe bu'wani endilisi nonda'apa mogala' molomana.\*

*Anaf apa' mofa' poe bu'wani endilisi mogala' moloma Krais*

<sup>18</sup> Ae' okom ma'i poe inimba bu'wani anaf netaga nendawalapa apa' gani heveni, inimba anaf nikila'am endilisi akafimi amamba apa' dei' mogofa'am nogota ata'i.\*

<sup>19</sup> Hiahawes hiasi lu'wis sa'wis God nanda'asi saloma apa' epes wapani masa'ma balagah naep do' endilisi ea' mape masasa nogota ape'itai ma awasi Godi anaf sotaga sondawalap alihis.\*

<sup>20</sup> Dei' hiahawes isimba lu'wis sa'wis saloma apa' epes ata' mape wafipa dowaf, maol akapa. Ina apa' atepa mola ukup manda'am mape, owa'atin. God atona nala'ambemapa mape lafela anen mape masasa hiahaom lu'wami anaf na'i nonda'ama ape'i.\*

<sup>21</sup> Dei' hiahaom awami amamba hiami mowa' hiahawes God nanda'asi salomapa epes mawasi'apa manda'apa awepa folo'walapa. Apa' anaf God notofa hiahaom amamba awami ea' mofa' mogogala'i mupe wahifipa andeande', amamba God nandandepam magapoma wambota ananisii.

<sup>22</sup> Apa' mogawa hiahawes hiasi lu'wis sa'wis God nanda'asi same' akafimi si'i nemata'w

---

\* **8:17** Ro 5:2; 2 Ko 4:17      \* **8:18** Kl 3:4      \* **8:19** Jen 3:17-19

\* **8:20** 2 Pi 3:13; 1 Jo 3:2

kwa'i kogola awani. Ea' hiahawes isimbai salef kwapete' sape safi'i sataga dei!. \*

**23** Apa' ina hiahawes isimba atis, owa'atin. Fa'i apa' epes ananipai wapani, God okom ma'i anaf owagama notopalopapa ma mogape andeande'. Ea' dei' anen nali' naso'apa Ambal bu'unai anan-inai. Ambal anamba naso'apana dowafi si'i presen. Ea' apa' wapani mame' akafimi kilef mape mohafa anef nemaf God notalepa ma mogataga si'i awasi ananipai, ma nemaf afamba nogaso'apa alop dambaipi namupi. \*

**24** God nowambelapa dei' mahapifana mape mohafana nonda'apa mogataga endilisi dindi'i dondo' ma hiahaom amamba fasimi. Apa' hiahaom mape mogohafami ma magatolom ea'i, apa' ina ata' mope mohafam wapani, owa'. Apa' i'i anin epen nigati hiahawes isimba nege-hafasi ea', dei' maina ata' nepe negehafas wapani? Owa'atin.

**25** Apa' hiahawes apa' ata' owa' mugatilisia apa' mogawa endilisi anaf mogofa'asi, na'amba apa' ukup banagep papoma isimba ea' mape mahafas.\*

**26-27** Ea' Ambal bu'unai Godi wapani nafi'i natopalopa apa' owa' banagipaia, nowa' banaga ukup ape'ipi. Nemaf mamahefa apa' ukup owa' banagepa mogawa basef ifimba mogahali'anaefia, Ambal ananinai nandabeten natopalopapa. Anen nandabeten, apa' anen ina na'i nandabeten nahali'ana ma anif basef, owa'. Nanda' e waa atin nandabeten. Ea' God,

---

\* **8:22** 2 Ko 5:2-4; Ga 5:5   \* **8:23** 2 Ko 5:7   \* **8:25** Sam 139:1; 1 Ko 4:5

nogawa ukup epesi hi'alep, nogawa okom Ambal ananinai wapani. Dei' main, nemaf afamba Ambal ananinai nandabeten na'amba, anen naila okom Godi nandabetena apa' epes ananipai.\*

**28** Hiahaom mamahoma ma'i mogatagamapai, bu'wami awami hiami, God nanda'am manda'maol atina mogatopalopa apa' epes ukup pagapagaila anini. Apa' epes isimba nogofalas ea'i ma sonda' maol sigaila okom ananimii.\*

**29** Dei' main, epes isimba God fowa' nogogawas ea'i nosaho'asa sotaga sondati na'amba atin si'i Nogamana ananinai ma anen notaga nogape si'i sahomas dembinai ma esis sahin owan wambota ananisi.

**30** Epes isimba fowa' nogosaho'as ea'i, anennofalas wapani. Ea' isimba nogofalas ea'i, anen na'i esis epes usi'isi ma naep ananipi ea' naso'as banagami mogogala'i ananimi ma anaf sondati si'i anen.\*

### *God okom maimailapa ina nokwahepa, owa'*

**31** Apa' mame' basefa hiahaom amamba bu'wami God nanda'mapami dei' muwatanif mi'imama? I'i God nogatopalopapa, dei' anaf ina anis la'ifisa sogohambombagapa, owa'atin endilisi.\*

**32** Anen ina ombal mahanama nagaso'apai Nogamana ananinai, owa'atin. Anen nasapa'anai nafl'i ma nogatopalopa apa' hiapai. Na'amba dei' isimba endilisi atis anaf anen nagaso'apai anom

\* **8:26-27** Ef 1:11

\* **8:28** Kl 1:18; Hi 1:6

\* **8:30** Sam 118:6

\* **8:31** Jo 3:16

hiahaom hiami wapani dowaf mugalumai anini.  
\*

<sup>33</sup> Apa' epes nogosaho'apa ea'i, anaf open ami ni'i apa' epes aupai manda' waf awafii? Owa'atin. God atona na'i apa' epes usi'ipai. \*

<sup>34</sup> Anaf ina anis epes sofalapa si'i apa' epes aupai ma God nogagwamapa waf awafii ape'ifi, owa'atin. Dei' main, Krais Jisas naga' notanima nosafel wapani. Ea' anen nepe wa'ol lagol kwahisigili Godi banagagoma ea' nandabetena nagatopalopapa wapani.

<sup>35</sup> Anaf maim da'im melefatapa ma mogakwaha okom Kraisi magamagailapai? I'i nimanimi mogatagamapa ma mogofa' akafimi ma nolomohapa klos luwaguf mais akapa a anis sohapa sonda'apa awepa ma i'i hiahaom awami mi'i mogahambombagapa, ma anis sohapa mogaga', anaf hiahaom amambai melefatapa ma okom Kraisi magamagailapai? Owa'atin endilisi. \*

<sup>36</sup> Endilisi, hiahaom na'ambaimi motagamapa si'i Baibel na'iam naga'i,

"Apa' mape amam nematawa ine'ipai, isimba atis dei' nimaguf hiafi sa'i sohapa mogaa'. Satelepa si'i sipsipa sa'i sohapa mondaga' atin."\*

<sup>37</sup> Apa' hiahaom amambai hapaimi. Krais anen okom maimailapa a'owa' ea' dondol nowa' banagapa nanda'apa mikila' hiahaom amambai endilisi.

---

\* **8:32** Ais 50:8    \* **8:33** Sam 110:1; Ap 7:55-56; 1 Jo 2:1    \* **8:35**  
Sam 44:22; 2 Ko 4:11    \* **8:36** Jo 16:33

**38** Aho' ae' egawa endilisi, ina anom maefah la'ifima anaf melefatapa ma okom lu'unai Godi, owa'atin. Nemaf mamahefa apa' moga' a'a mogape, anen okom maimailapa atapim. Amom ensel maloma banagami awami mamimami mape mugumafi itapi, opa'wal, ma'akw, naoh, ambagof awami mamimami wapani a hiahaom dei' magapani a anom anaf migi' mogatagai, banagami mamimami

**39** a hiahaom banagami awami magape ilifi itap awini a anom hiahaom migi' mogafi'i, hiahaom amamba hiami ina anaf la'ifima megele-fata apa'ma okom lu'unai Godi, owa'atin endilisi. Anen okom maimailapa atapina nihimba'mapa amamba ma Krais Jisas Dembinai ape'inai.

## 9

### *Pol okom iwanim endilisi ma esis Israel*

**1** Basef ifimba ae' aga'iefi endilisi, ae' aman Kraisi ea' ina ambaso'am, owa'. Ambal bu'unai Godi nihimba'me nalome umafi malogol gagape opaf ae' nomoni nihimba'me na'ipi aga'i basef endilisifi atifi.

**2** Basef ifimba na'amba. Opaf ae'afi nimanif endilisi ea' okom mandanda' mafe' aom dondol. \*

**3** Ae' okom ma'i a'owa' ma a'i God nowambilai esis alipisi esimbel atembel ae'asi Israel sotani-mai. Ea' i'i ano'w ufia'w na'ambaiai, ae' end-abetena Kraisa ae' lamene egaho'ofa esis sogafe' wambel bu'wambili heven, apa' ae' owa'atin. \*

**4** Apa' Israel God nandandepapa ea'i, nanda'apa mataga awasi ananipai ea' na'i aho'ma mogati

---

\* **9:2** Eks 32:32    \* **9:3** Eks 4:22; Diu 7:6, 14:1-2

mogogala'i banagami ananimi. Anen nala' lapa basef ananifi nalomapa ea' naso'apa mu'uli bu'wani ananini naloma waf endilisifi monda' lotumafi. Apa' mofa' basef ifimba God naga'i endilisi atisafi.\*

<sup>5</sup> Bafapapa akupapa dembami ape'imi mamumba magali'i amamba ape'imi atom. Ea' esimbrel ape'imbeli atembel Krais nataga epen, anen God nandandepana nasapa'ana nagafi'ii, nape nali'ma epes saloma hiahaom hiami numafiam. Anen God endilisinai ea' mondasa'ma agol ananigili dondol lifilafi. Endilisi.\*

### *God nandandepa esis amam nematawa ananisi*

<sup>6</sup> Apa' basef ifimba God nagala' lapafi ina higiligalef dowafi, owa'atin. Epes sagataga mini'ap Israeli, hiasi ina a' Israel atis endilisi God nandandepas ananisi ea'i, owa'!\*

<sup>7</sup> Ea' apa' ina a' mi'iam na'amba mi'i, "Esis sataga esimbrel Abrahami ea' esis hiasi a sape batawis endilisi ananisi," owa'atin.

Fowa' gani God naga'ipana na'amba na'i, "Esis esimbrel Aisaki atis owagama sofa' agol wambota ine'isi."\*

<sup>8</sup> Isimba na'amba. Anis batawis Abrahami ina awasi Godi, owa'atin. Isimba sagataga basef ifimba God nala' lapef nagaso' Abrahamafi atis, agol gatomas ea' bafasana Abrahami endilisi. \*

<sup>9</sup> Lapa basef ifimba faga'i na'amba fa'i, "Nemaf afamba andandepaf ea'i, bola itanimai ea' Sera kola awani aman."\*

---

\* **9:4** Mt 1:1-16; Jo 1:1; Ro 1:25    \* **9:5** Nam 23:19; Ro 2:28    \* **9:6**  
Jen 21:12    \* **9:7** Ga 4:23    \* **9:8** Jen 18:14    \* **9:9** Jen 25:21

**10** Ea' ina isimba atis, owa'. Nogaopa'w biam Rebekai ahamam atotona ea' Aisak atona bafamapa ape'inai. \*

**11-12** Apa' God okom mandanda' ea' ma waf nandandepa epesafi. Anen ina okom mandanda'ma maol epes sanda'ani ea' nosaho'as, owa'atin. Nogaopa'w amamba biam ata' mape nomona nembel akwa'umbili God na'ipa'w na'i, "Nogali'i dembinai a' nope lafela aonama nogagi'i. Sahomana anaf nonda'mana maol owamana."

God naila okom ananimi atom dei' na'ipa'w na'amba. Anen ina okom ma'i anin maol bu'wani awani amom anaf monda'ani, owa'atin. Anen naila okom ananimi atom na'i basef na'amba. \*

**13** Amamba si'i Baibel naga'i, "Ae' okom maimaila Jekop, apa' Iso andaiwa'mana endilisi."

**14** Ea' apa' dei' ata' mi'i main? Mi'i, "God nanda' waf owa' andeande'a?" Owa'atin endilisi!\*

**15** Anen na'ipa Moses na'i, "Endilisi, anaf ae' i'i uwahipigama epen mamahina iga'i uwahipigamani ea' etopalopa epen mamahina ae' okom ma'i igatopalopani."\*

**16** Apa' ina mi'i ukup epesi atip paloma maol epesi atin sanda' God natopalopapa, owa'atin. God atona nati apa' uwahipipa dei' okom ananimi atom natopalopapa dowaf. \*

**17** Ea' Baibel na'i God na'ipa dembinai king Fero na'amba na'i, "Ae' a'i ihmiba'masa banagami ae'ami epes hias ma anaf sogawalapa agol ae'agili

---

\* **9:10** Jen 25:23 \* **9:11-12** Mal 1:2-3 \* **9:14** Eks 33:19 \* **9:15** Ef 2:8 \* **9:16** Eks 9:16

sigai'agol itap hiagoma. Isimba atis dei' afelena nanda' hiahawes isimba."\*

<sup>18</sup> Apa' mogawa i'i God ni'i nogatopalopa anin epen dowaf, dao' anen notopalopan. Apa' i'i nogasopama opaf anin epenima, dao' nosopama-manaf.

*Okom wandafunai Godi naloma uwahipimi ananimi*

<sup>19</sup> Apa' ina' atiasi ni'ipa ae' na'amba ni'i, "I'i na'ambama, dao' dei' maina God ata' naga'iam atin naga'i epen kofagema mapomana waf awafi anin nanda'afi? Ami la'ifina negapa'aga okom banagami Godi mogohafili? Owa'atin."\*

<sup>20</sup> Apa' epen, ina' mamahinama ma ni'i niginifala God? Owa'atin. A'i malep sanda' nombol sagala'api la'ifipa piginifala aman anamba nanda'ap nagala'api pigal'i, "Dei' maina ina' nanda'e na'ambae?" Owa'atin. \*

<sup>21</sup> Aman nagala' malihi nofa'i anep itap nala' maloh biahap, anep maol bu'wanipi, anep falafalafipi maol awaniapi. Endilisi isimba andeande'.

<sup>22</sup> God wapani nanda'am na'amba atin si'i aman nagala' malihi. Fowa' nanda' epes sataga ea' naila okom ananimi atom na'i aho'ma anis epes sogafe' ufia'w higilgalasa'wi. Esis safe' ufia'w akwamba, apa' anen ina nagwamasa waf awafi esis sanda'afi ulal, owa'. Anen ata' nanimbelis nepe nasasas nogota laota ma anaf nogahambombagas. Dei' main, anen na'i nowalapa okom numbutinai ananinai

---

\* **9:17** Eks 4:21, 9:12; Eks 14:4    \* **9:19** Ais 29:16, 45:9    \* **9:20** Jer 18:6

notaga alihina noloma banagami ananimi ma  
epes hiasi sogogawam. \*

**23** Anen na'i nowalapam motaga alihim hia-  
haom mogogala'i fasimi ananimi ma anis epes  
anen nagati uwahipisi sogogawam. Epes isimba  
anen naila okom ananimi atom fowa' nandande-  
pasa nogaso'asa mogogala'i esis.

**24** Amamba ea' ma'i apa' atepa. Anennofalapa  
ea'. Ina nofala anis Juda atis, owa'atin. Nofala anis  
owa' Judaisia wapani. \*

**25** Basef anona aman profet Hosea fowa'  
nanda'afi wapani faga'i na'amba fa'i,

"Esis amam nematawa isimba fowa' ina epes  
ae'asi, anaf i'i esis epes ae'asi, ea' epes  
isimba fowa' ae' owa' okom mogailasia  
egaso'asa opafia, anaf okom mimilas. \*

**26** Ea' wambel ali' a'ipas aga'i, 'Ipa' ina epes  
ae'ipai', anafwambel ambalemba atembel sofalias  
si'i, 'Esis awasi Godi nagape namunai.' \*\*

**27** Fowa' profet Aisaia nondola'waifa esis Israel  
na'amba na'i,

"I'i esis Israel sotaga hias a'owa' si'i ko'onaga  
gaga'oh naoh akata ai, ea' hapaisi. Anaf  
Dembinai nofa'ai kwasala'wis dowaf nok-  
 wahomas wafawafi sotanimai.

**28** Anen nonda' basefa kot hi'ilif notopa'ef  
kwafalis nogwamasa akafimi epes hiasi itapasi  
hi'ilas."\*

**29** Ea'na'amba atin si'i fowa' Aisaia na'ias naga'i,

\* **9:22** Ro 8:29; Ef 1:3-12

\* **9:24** Hos 2:23

\* **9:25** Hos 1:10

\* **9:26** Ais 10:22-23

\* **9:28** Ais 1:9

“I'i Dembinai banagonai nugumafi hiahaom hi-amii owa' nosopama akafimi epes isimba sagape itap apa'ii ai, anaf apa' motaga lamonapa si'i walemb ambalemb bialemb Sodomi Gomora. Apa' owa', owa'atin. Nasopamam ea!.”\*

### *Esis Israel sanda' maola sogofa' wafusi'ifi*

<sup>30</sup> Dei' apa' ata' mi'ias mi'imama? Apa' mi'ias na'amba mi'i, “Esis owa' Judaisia ina sanda' maol noma'wini ma sogofa' waf usi'ifi, esis sofa' waf afamba ea!. Esis sahapifa God sofa' waf afamba usi'ifi. \*

<sup>31</sup> Apa' esis Israel sanda' numa'umi ma sagaila mu'uli God nagaso' Mosesani ma sogofa' waf afamba usi'ifi, owa' esis ina sofa'af, owa'atin.”\*

<sup>32</sup> Dei' main, esis sandaiwa'ma sohapifana sogofa' waf usi'ifi. Esis ukup pandanda' pa'i sonda' maol atin sofa'af. Owa' asendesambaola anom otam sowa.

<sup>33</sup> Amamba si'i Baibel naga'i,  
“Peme! Ae' ambe' anom otam wambel lu'wambili esis Israeli agol Saion. Otam amamba banagami motawa mogahambombaga epes sendesambaola sogowa. Apa' epen ami nigahapifa aman anambai, anaf anin ina okom iwanim, owa'atin. Nepe sonohan.”

## 10

### *Israel ina sofa' wafusi'ifi Godi, owa'*

---

\* **9:29** Ro 10:20    \* **9:30** Ro 10:2-3    \* **9:31** Ais 8:14    \* **9:32** Ais 28:16; 1 Pi 2:6; Ro 10:11

**1** Alipipai, okom ae'ami ma'ias a'owa' and-abetena anaf God nofa' esis Israel nokwahomas waf awafi sogotanimai.

**2** Ae' egawa esis andeande' ea' a'i isimba. Esis ukup pehafel a'owa' sanda' maol banagani ma sogaila God, apa' owa' esis ina sogawa basef Godi endilisifi andeande', owa'atin. \*

**3-4** Esis ukup mahamahasa waf God nanda'afi ma nogal'i apa' epes usi'ipai. Ea' sanda'am sandawalapa waf usi'ifi asasifi atefa sagaila mu'uli inimba God nagaso' Mosesani. Ea' esis ina safe' lafela Goda nogal'i apa' epes usi'ipai, owa'atin. Apa' Krais nafi'i nataga ea'. Isimba atis dei' apa' ina ata' mape lafela mu'uli inimba, a' owa'atin. Anen nafi'i nandawalapa amam nematawa mamahisa sagahapifa anini ea' dei' Godnofalas na'i esis amam nematawa bo'wes hilili'.\*

**5** Waf afamba open nagaila mu'uli inimba ma God naga'i anin usi'ini, Moses fowa' naga'ias na'amba na'i, "Epen ami nenda' waf afamba hiafi andeande' hi'igalafi, anaf anin nefo' ambal namili ma nigaila mu'uli inimba."\*

**6** Apa' waf open nagahapifanai God na'i anin usi'ini, waf afamba faga'ias na'amba fa'i, "Ipa' owa'i ukup pendanda' ma nelelemb ipe'ilimbi pi'i, 'Anaf ami nefo' nelota heven?' nihali' Krais nigosila'i, owa'i.

**7** "Ea' ipa' owa'i pi'ias na'amba pi'i, 'Anaf ami nefo' newala wambel epes sagaga'ii nihali' Krais notanimai.' Na'ambai wapani owa'i."

\* **10:2** Mt 5:17; Jo 3:18      \* **10:3-4** Ro 7:10; Ga 3:12  
30:12-14

\* **10:5** Diu

**8** Apa' basef ifimba fa'i main? Ifimba faga'i na'amba fa'i,  
“Basef ifimba fape felefele'ma ipa', fape malogufi nelelemb ipe'isi.”

Basef apa' magahapilafi mawalapef maga'iefi ifimba.

**9** I'i ipa' pewalapa basef ifimba alihif pi'i Jisas anen Dembinai ma pihapifa God nelelemb ipe'ilimbi pi'i anen NASA'mana nogosafel matmat wapani, bola God nofa'ai ipa' wapani pitanimai pepe andeande'!

**10** Dei' main, apa' mahapilif nelelemb ape'ilimbi God na'i apa' amam nematawa magataga be'epa hilili' ea'i. Ea' mawalapa hapif malogof ape'igufi God nofa'apa nokwahomapa waf awafi mutanimai mape andeande'.\*

**11** Amamba si'i Baibel naga'i,  
“Epen mamahina nagahapifa anini, anaf epen inimba ina okom iwanim, owa'atin.”\*

**12** Esis Juda saloma isimba owa' Judaisia ea' na'amba atin, God anen Dembinai atotona apa' hiapaii. Ea' anen natopalopapa naso'apa waf bu'wafi dowafa epes isimba mamahisa sogofala anini,\*

**13** si'i Baibel naga'i,  
“Epes mamahisa soga'i agol Dembinai ma sogofala anini, atiasi nofa'as nokwahomas waf awafi sotanimai.”

**14** Apa' i'i esis owa' sohapifanaia atiasi sofalana sogawana si'i mama? Ea' esis i'i owa' seme' basefanaea, atiasi sohapifana si'imama? Ea' i'i anin

---

\* **10:10** Ro 9:33   \* **10:11** Ap 15:9   \* **10:12** Joe 2:32

epen owa' ni'ipasa basef esisa, dei' esis sogawef si'imama? Owa'atin endilisi. \*

<sup>15</sup> I'i God owa' nosapa'i amam amambaia, dei' atiasi amom mefe' mowalapef mi'imama? Owa'atin. Si'i Baibel naga'i na'amba na'i, "Awasi! Maol inimba epes sofa'i basef bu'wafi ae'afi sogafi'ii, inimba fasini endilisi a'owa!"\*

*Esis Israel ina saila basef bu'wafi Godi, owa'atin*

<sup>16</sup> Apa' ina Israel hiasi saila basef ifimba bu'wafi Godi, owa'atin. Fowa' profet anamba Aisaia naga'i na'amba na'i, "Dembinai, anaf ami nihapila basef ifimba esis sogame'efa afa'i? Owa'atin."\*

<sup>17</sup> Ea' apa' mogawa, apa' hiapai mame' basef bu'wafi ea' ifimba atif fasa'mai hapif ape'ini. Ea' dei' basef ifimba fataga ufia'w mai'w? Ifimba fataga amom magawalapa basef Kraisi atom. \*

<sup>18</sup> Apa' ae' a'ias na'amba. A'i esis ina same' basef ifimba bu'wafi? Owa'atin. Esis same'ef ea', si'i Baibel naga'i,

"Basef fafe' fandahama walemb hielimbi fafe'agon hi'alagon."\*

<sup>19</sup> Ae' etambel a'ias. A'i esis Israel sogawa basef ifimba a'a owa'? Owa'atin. Sogawa ea'. Moses nali' naga'i basef ifimba na'i,

"God na'i, 'Ae' efa' anis amam nematawa falafisi, esis ina epes banagasi anep mini'ap endilisipi, owa'. Ae' ifa'asi etopalopas falafis anaf ipa' kowolepama waf bu'wafi

---

\* **10:14** Ais 52:7    \* **10:15** Ais 53:1; Jo 12:38    \* **10:16** Jo 17:20

\* **10:17** Sam 19:4    \* **10:18** Diu 32:21

ae' enda'masaf esisi. Ae' ifa'ai epes isimba owa' sogogawaia ea' anaf ipa' pinifalis penda' megahohas.' ”\*

**20** Apa' Aisaia ina ombal mahana ma na'iam nagawalapam, owa'atin. Anen nawalapam na'iam alihim na'amba na'i,

“Epes isimba owa' sogolaoma ae'ia, dei' satolowe ea'. Epes isimba owa' sogahali'asa ae'ia, dei' ataga andawalapa esis.”\*

**21** Apa' esis Israel ina na'ipas na'amba, owa'atin. Anen na'ipas anif daif na'i,

“God na'i, ‘Epes isimba sanda' du'wanigai soga'sambala basefi. Nogota lautai a'owa' ae' efalas anda' lagof iwaulasi. Owa', owa'atin.’”

## 11

### *God natopalopa Israel mini'ap du'wanis atis*

**1** Dei' a'i ihali'ipa, God a' nali'amona Israel hisi mini'ap ananisi? Owa'atin endilisi! Ae' wapani Israeliwai esimbel Abrahami, wambota Benjamini.\*

**2** Mini'ap isimba Godi anen fowa' nandandepas ea'i, ina nali'amonas, owa!. Ipa' pegawa basef Elaijai fagail Baibeli. Elaija nandabeten nanda' kotima esis Israela God, naga'l na'amba na'i,\*

**3** “Dembinai, esis saha amom profet maga!. Ea' sugulata belitagw ine'igwi sondolaliminama. Ea' ae' atowe ata'

---

\* **10:19** Ais 65:1    \* **10:20** Ais 65:2    \* **11:1** 1 Sml 12:22; Sam 94:14; Fl 3:5    \* **11:2** 2 Kin 19:10,14

atapiwi ape profet anda' maola ina'. Dei' esis salasolaome ma sehe egaga!.”\*

**4** Apa' God nagwamana basef maif Elaija? Anen na'ipana na'i,

“Ae' ifa'ai epes hiasi 7,000-pelais ae'asi, isimba ina sanda' lotuma god baso'amunai Baal, owa!.”\*

**5** Isimba ea' na'amba atin si'i dei' wapani esis mini'ap du'wanis sape, God fowa' natilis uwahipis natopalopas dowaf. Isimba atis dei' nosaho'asa sagape epes ananisi si'is. \*

**6** Anen nati uwahipis natopalopas dowaf nosaho'as. Anen ina okom mandanda'ma anin maol bu'wani esis sanda'ani nosaho'as, owa'atin. I'i esis sonda' maol bu'wani ma God nosaho'asai, anen ina a' niti uwahipis maol bu'wani ma God nosaho'asai, anen ina a' niti uwahipis notopalopas dowaf nosaho'as, owa'atin. I'i na'ambaiai, waf afamba nagati uwahipisafi, afamba falafifi atef, owa' endilisifia.\*

**7** Dei' apa' ata' mi'ias mi'imama? Waf afamba God niti epes nigai' be'es hilili'i, afamba esis Israel sanda' numa'umi ma sa'i sogofa'afi, apa' ina sofa'af, owa!. Fowa' God nosaho' esis du'wanis atis ea' isimba atis sofa'af. Apa' esis Israel hiasi opalef asasimi maso'as ea', \*

**8** si'i buk Baibel naga'i,  
“God nanda' opalef asasilifi si'i saga'oh. Nanda' naep asasipi ina pati ea' esis ina same' basef

---

\* **11:3** 1 Kin 19:18   \* **11:4** Ro 9:27   \* **11:5** Ga 3:18   \* **11:6** Ro 9:31   \* **11:7** Diu 29:4; Ais 29:10

kofagefa, owa'atin. Ea' sape na'amba atin safi'i sataga dei!.”\*

**9** Devit wapani na'i basef ifimba atifa waf opalef esis Israeli maso'as ea' na'i,

“Ae' a'i nemaf afamba esis sope soga' gwa'aisi lu'wasi atin, God nowasi'asa nogagwamasa waf awafi esis sanda'afi si'i mandelef sandolam mail alialefa mogowa' mafis, ea' si'i isalefi waiwa sanda'am magapoma mafisi.

**10** “Ae' a'i naep asasipi petaga walufipa ina atiasi siti. Ea' ina' awi nenda' nimanimi akafimi mindiwa alafugah asasigahi ma atapis sogape na'amba atin.”\*

### *Atiasi God nofa'ai esis owa' Judaisia sotanimai wapani*

**11** Dei' ae' ahali'ipa. Esis Juda sendesambaoi sowa lamonas? Owa'atin endilisi! Esis sololama ufia'w sanda' waf awafi, isimba atis dei' God notanima nofa' anis epes sogololama Godi owa' Judaisia sotanima safe'ma anen. God nanda'as na'amba ma esis Juda ata' sigati waf afamba fasifi nanda'masaf esis sogololama anini ma anaf esis Juda kowogalasa waf afamba bu'wafi God nanda'masafi.

**12** Esis Juda sowa' alafugaha God, isimba atis dei' anen natopalopa amam nematawa hiasi itapasi sagape walemb hiagomai. Esis Juda sololama waf Godi, isimba atis dei' God natopalopa isimba owa' Judaisia nofa'as sotanimai sogape andeande'. Ea' nemaf afamba esis Juda hiasi hi'ilas dondo'ma

\* **11:8** Sam 69:22-23; Sam 35:8    \* **11:10** Ap 13:46; Ro 10:19

ikwaf God okom maga'iefi sotanima sifi'mai anen, esis misi'ah hiasi owa' Judaisia, God notopalopas endilisi ma nofa'ai hiasi sotanimai.

**13** Dei' a'i ese'epa anif basef ipa' atipa owa' Judaipaia. God nasapa'e afe'ma anda' maola esis owa' Judaisia si'i ipa'. Ea' sonahema maol inimba bu'wani dei' anda'ani.

**14** Maol inimba ae' okom ma'ian a'owa' ma egasa'ma esis Juda wambota ae'asi ma kowogalasa ipa' dei' pape andeande' pagaloma Godi. Ama ae' egefa' esis Juda du'wanis atis sotanima sogafe'ma God.

**15** Aho', anen nowa' alafuga ma esis, isimba atis dei' nofa'ai anis epes itap hiagoma sataga nembel atembel salomana. Ama anef nemaf God noso'as nembela esis Juda sotanima sogafe'ma anen, notopalopa epes hiasi itap hiagoma sotanima sope andeande' sondagala si'i sondagala ma anis epes saga' sotanima sogasafeli.\*

**16** Waf afamba esis Juda sotanima sogafe'ma God si'i basef waminif atini na'amba fa'i, i'i bret du'wanita tagali'i sanda'ata saso'anata Godi bo'ota hilili', ea' bret si'ita wapani Godi bo'ota hilili'i atota. I'i esis soso'ana nombalef lawagilif si'ilif God, dao' agufugama wapani Godi atoga.\*

**17** God nindiwaga nelefata anogof agof lawag oliviga sagawaga aofi ea' nofa'ai anogol agola anoga lawag oliviga alupugai nuwataniaga lawag agamba sagawaga aofi. Ipa' owa' Judaipaia, ipa' si'i agol lawag agamba alupugai. Isimba atis dei' ipa' pefa' hiahao maim bu'wami mataga ma

---

\* **11:15** Nam 15:17-21; Esi 44:30    \* **11:16** Ef 2:11-19

epes isimba Juda si'i agol lawag agamba alupugai gogofa' ifata nombalef lawag sagawaga aofi. \*

**18** Dei' ipa' owa' Judaipaia ina pi'i ipa' atipa bu'upai pikila' esis Juda si'i agof agwafomba God nigindiwagufi, owa'. Ipa' ina' pi'i ipa' bi'ipai esis epes awasi, owa'i. Dei' main, ipa' ina pegewa' banaga nombalifi, owa'. Nombalef atelef fewa' banagaipa.

**19** A'i ipa' atiasi pi'ias na'amba pi'i, "God nindiwa agof agwafomba ma nogowatani apa' si'i anogol agol lawagigil."\*

**20** Dao' andeande', apa' esis Juda ina sahipifana, isimba atis dei' nahape'as. Apa' ipa' pahapi-fana dei' pape sisihipama anen. Apa' ipa' owa'i pesa'ma agof ipe'igufi pi'i ipa' atipa bu'upaia, owa'i. Ipa' ombal mondahepa solawaipa.

**21** Fowa' God ina na'i aho'ma esis Juda si'i agof agwafomba lawag sagawaga aofi fape atapiguf, owa'. Ipa' solawaipa. Na'amba nondam'epas na'amba atin si'i nanda' esis.\*

**22** Ea' ipa' ukup pendanda'mam andeande' okom biafim Godi uwahipimi wandafumi wapani. Epes sagakwaha waf ananifii, na'ipas dindinip. Apa' ipa' God naga'i uwahipipai, i'i ipa' pigaila uwahipimi amamba, dao' andeande'. Apa' i'i owa', anaf notopa'epa wapani.

**23** I'i esis Juda sokwaha waf awafi sogosambala Godafi, dao' atiasi nofa'as sotanimai si'i nogowatania agof agwafomba fowa' nigindiwagufi. Endilisi, God banagonai ma nondam'as na'amba.

\* **11:17** Jo 4:22   \* **11:19** Ro 12:16   \* **11:21** Jo 15:2,4; Hi 3:14

**24** Ipa' pegawa fowa' ipa' ata' papani atin si'ipa lawag oliv alupugai, ea' God nanda' anin maol diaiana ipa' natopa' anogol agola lawag agamba ea' nowataniaga anoga lawag oliv bu'ugai sagawaga aof. God nanda' maol inimba. Ea' endilisi atis, anaf a' nofa' esis Juda sotanimai si'i agof nindiwagof lawag sagawaga aof nuwataniagof fitanima fope lawag afafugai si'liga. Maol inimba ina ahifina anen, owa!. Andipeni.\*

*God nati epes hiasi uwahipis natopalopas dowaf*

**25** Alipipai, ae' andaiwa'ma ipa' ukup pegehepama basef ifimba fowa' fandambahi'i dei' fandawalap alihif. Na'amba ipa' ukup pendanda' ma ipa' atipa pi'i, "Apa' mogogawai." Basef ifimba fowa' fandambahi'i na'amba. Esis Israel opalef asasilifi faso'as, apa' ina faso'as atapilif fape, owa!. Fefe' fefe' fendahama nogota atamba esis owa' Judaismia hiasi sifi'i sogafe'ma God dondo' ma ikwaf okom ananimi maga'iefi. \*

**26** I'i owa' main, esis Israel hiasi God nofa'as nokwahomasa waf awafi sotanima sifi'mai anen si'i Baibel na'ias naga'i,

"Anaf aman anamba nofa'as sogotanimai, nupani wambel Saion nifi'i notagwaha waf awafi esis wambota Jekopi, waf awafi sogosambala basef Godiefi. \*

**27** Anef nemaf

ekwaha waf hiafi awafi asasifi okom mose'eaf, i'ipasa basef agala' lapafi esis."

---

\* **11:24** Ro 12:16; Lu 21:24; Jo 10:16  
59:20-21; Sam 14:7      \* **11:25** Mt 23:39; Ais

**11:26** Ais 27:9; Jer 31:33-34

**28** Juda sosambala basef bu'wafi Godi, sataga bousi ananisi saha'ofa ipa' owa' Judaipaia nofa'epa pigatanimaii. Apa' God fowa' nosaho'as ea' okom maimailas. Dei' main, anen okom mapoma bafasam asasimi ma basef ifimba nala' lap nagalomamafi.

**29** I'i God nondandepa anin epen noso'an presen fasini dowaf, anaf anen ina nosambala basef ifimba ni'ipan ni'i hapaifi noho'ofef, owa'atin. Basef ifimba atapif fepe.

**30** Fowa' ipa' owa' Judaipaia pesambala basef Godi. Ea' esis Juda wapani sosambala basef ifimba. Isimba atis dei' ipa' pefa' okom uwahipimi Godi.

**31** Ea' na'amba atin dei' esis Juda wapani sosambala basef ama dei' sogofa' okom amamba uwahipimi Godi si'i ipa'. \*

**32** God nanda' epes hiasi hi' alas sogape lafela waf afamba sogosambala basefafi ma anen anaf niti esis hiasi uwahipis nogatopalopas dowaf.\*

### *Apa' mondasa'ma agol Godi lu'wagol*

**33** Awasi! Okom Godi naloma gawa ananini fasini lu'um a'owa' endilisi. Apa' epes ina la'ifipa endilisi ma mogogawa kofagema basef ananifi, okom hiami mogatambela, owa'atin. Apa' owa'atin endilisi ma mogawalapa basefa anen okom maga'iefi. Ea' apa' owa' mogawa wafhianai ananinaia, owa'atin.\*

---

\* **11:31** Ga 3:22; 1 Ti 2:4    \* **11:32** Ais 55:8-9    \* **11:33** Ais 40:13;  
1 Ko 2:16

<sup>34</sup> Endilisi atis, si'i Baibel na'ias naga'i, "Ami negawa okom Dembinaii? Ami naso'ana nomonas anen? \*

<sup>35</sup> Ami nali' naso'ana hiahawes anen ama atiasi nogagwamanas? Owa'atin endilisi."\*

<sup>36</sup> Anen nanda' hiahaom hiami hi'alam magape ilif itapi numafiam maloma epes. Ea' hiahaom amamba hiami maloma epes mape ma mogasa'ma agol ananigili atogol. Apa' epes hiapai hi'ilapa mondasa'ma agol ananigili lifilafi dondol. Endilisi.

## 12

*Apa' mondolali ma God mondaso'ana alop ape'ipi si'ip*

<sup>1</sup> Alipipai, basef ifimba hiafi fagali'i endilisifi atif. Isimba atis dei' ahali'ipa dindinipa ipa' ukup pendanda'ma okom lu'unai Godi nagana-gaila ape'i nagati apa' uwahipipa. Ea' pindilali ma anen si'i fowa'saha mafis sagaso'ana pendaso'ana alop ipe'ipi si'ip hi'indalap. Alop ata' pope namop atapip pese'anap God atona hi'ilap ea' ananipi si'ip, si'i waf anen okom maga'iefi. Ipa' penda'as na'amba, penda'lotu endilisi ma God ukup ipe'ipi nomon. \*

<sup>2</sup> Ipa' ina pepe pindati na'amba atin si'i sagaila waf itapafi, owa'i. Ipa' pi'i aho'ma God nonda' ukup ipe'ipi nomon petaga dambaipa waf ipe'ifi

---

\* **11:34** Jop 41:11   \* **11:35** 1 Ko 8:6   \* **12:1** Ef 4:23; Ef 5:10,17;  
Ro 6:11,13; 1 Pi 2:5; Jo 4:24

atiasi fegataga dambaif wapani. Ma bola pegegawa waf endilisifi God okom maga'iefi. Waf afambai bu'wafi usi'ifi.\*

*Apa' monda' maol mundaila gawa fasini God nagaso'apani*

<sup>3</sup> God natopalope dowaf, isimba atis dei' a'ipipa atona atin. Ipa' pegawa waf faloma gawa ipe'ini sandanda' sa'imama, apa' ipa' ina ukup pendanda' pi'i ipa' atipa fasipai endilisi, owa'i. Ipa' ata' pewaloga ipa' ukup pendanda' pefe' ande-ande' pendahama hapif ipe'ini God nagasi'ipani nafe' negetambel. \*

<sup>4</sup> Apa' mogawa alop ape'ipi atotop, apa' sa'osa'opa hiapi. Ea' apamba hiapi ina panda' maol atifin, owa'atin. Panda'an daindai. \*

<sup>5</sup> Ea' na'amba atin apa' amam nematawa hiapai magape sisihipama Kraisi, apa' si'i alop atotop. Ea' apa' hiapai atona atin si'i mandatopalopa atin magaloma anop alop wa'awa'api hiapi. \*

<sup>6</sup> God natopalopapa dowaf naso'apa presen hihahaom fasimi ananimi maloma gawa naninani. I'i God nosa'ma okom anin openi ma negawalapa anif basef, anin nendawalapef dondo' ma hapif ananini.

<sup>7</sup> Epen mamahina negatopalopa esis sahin owani, anin nendanda' maol inimba endilisi negatopalopa alipisi. I'i epen gawaini ma nigihimba'mas si'i tisai, anin nendanda'an endilisi nihimba'mas. \*

---

\* **12:2** 1 Ko 12:11; Ef 4:7    \* **12:3** 1 Ko 12:12    \* **12:4** 1 Ko 12:27;  
Ef 4:25    \* **12:5** 1 Ko 12:4-11; 1 Pi 4:10-11    \* **12:7** 2 Ko 9:7

**8** Ea' epen ami negegawa ma negafela ukup esis epesi, dao' anin nendanda' maol inimba endilisi negasa'ma ukup asasipi. Epen negaso'an hiahawes anin alipinii, anin a'nendaso'an hias. Epen nigimafi anin maoli, okom ananimi mondohafel endilisi ma maol inimba. Epen nigati anin alipinii uwahipini ma netopalopan nigimafiani, anin sonohan nendatopalopan.\*

*Waf endilisifi ma ukup pigapigaila esis sahin owan*

**9** Ipa' ukup pagapagaila esis sahin owan, dao' ipa' ukup pindailas endilisi. Ipa' ina pembmaso'am, owa'i. Ipa' pendewa' alafugah endilisi ma waf awafi, pendape sisihipa endilisi ma waf bu'wafi. \*

**10** Ipa' pendaso'asa opalef esis sahin owan ukup pindailas endilisi. Ipa' hipai atona atin pendasa'ma agof isimba anis daindaiasi atis. \*

**11** Ipa' pendanda' maol banagambel lifilafi ukup pehafel a'owa' penda' maol Dembinaii. \*

**12** Ipa' pepe pehafa Dembinai nogatopalopepa. Ea' pendagala atin hi'indalepa. I'i nimanimi mogatagamepa, pilutu banagepa. Ea' pendabeten nimaguf danda lifilafi. \*

**13** I'i amam nematawa Godi hiahawes akas, dao' petopalopas pese'as. I'i epes analemb walemb lauguni sifi'i sogatagamepa, dao' pimafias ande-ande!.\*

---

\* **12:8** 1 Ti 1:5; 1 Pi 1:22; Emo 5:15   \* **12:9** 2 Pi 1:7; Fl 2:3   \* **12:10**  
 Ap 18:25; Re 3:15   \* **12:11** 1 Te 5:17   \* **12:12** Hi 13:2   \* **12:13**  
 Mt 5:44; Ap 7:60; 1 Ko 4:12

**14** Epes sogahambombaga ipe'i, pendabeten pi-hali' Godanofalo'mas sogataga andeande'. Aho', pendabetena esis. Apa' ipa' ina pendabeten pi-hali'ana nonda' esis awes, owa'i. \*

**15** Esis epes sondagalai, ipa' sonehepa pendalamas. Ea' isimba sogalifi, pelef pelomas.\*

**16** Ipa' ukup pendapoma sahin owan ipe'isi hi'indalas pepan opalef atelef pendalommas, si'i ukup pagapoma ipa' atipa. Ipa' ina ukup pendanda'ma ipa' atipa pi'i dembipai, owa'i. Pefe' peloma epes isimba falafisi. Ipa' ina ukup pi'i ipa' atipa gawaipai, owa'i.\*

**17** I'i epes sonda' waf awafi ma ipe'i, ina pegwamasa waf awafi esis, owa'i. Ipa' ukup pendapoma waf bu'wafi ma naep epes hiasii penda'af. \*

**18** Ipa' ina ukup pendanda'ma wandaf, owa'i. I'i uafia'w andepa'wai, ipa' pepe opalef atelef pelomas hi'indalas.\*

**19** Ipa' alipipai ae'ipai endilisi, ina pegwamasa waf aunai esis sanda'mepa anai, owa'i. Ipa' pindihi'ammasondafe'mago Goda okom wandafunai nondanda' maola esis. Dei' main, basef fagail Baibeli fa'i,

“Waf gawai ma anis epes sanda' waf awafii, afamba maol ae'ani. Ae' atowe bola egwamasa waf afamba awafi ma esis.” Dembinai naga'i na'amba.\*

**20** Apa' ipa' penda'as si'i Baibel naga'i,

\* **12:14** Sam 35:13      \* **12:15** Ro 15:5, 11:20; Pro 3:7; Ais 5:21

\* **12:16** 1 Te 5:15      \* **12:17** Mk 9:50; Hi 12:14      \* **12:18** Diu 32:35; Mt 5:39; Ro 13:4; 1 Te 1:6-7; Hi 10:30      \* **12:19** Pro 25:21-22; Mt 5:44

"I'i bousi ipe'isi nolomohas, dao' pese'asa gwa'aisi  
esis. I'i iap pese'as, pese'asa embel. I'i  
ipa' penda'as na'amba, atiasi penda' esis  
ambagof awagofa waf awafi asasifi."

**21** Ea' dei' a'ipipa, ipa' ina pepe pititi waf awafi  
fikila' ipa', owa'i. Apa' pendanda' waf bu'wafi ma  
pegatalogofa waf afamba awafi.

## 13

### *Apa' mondape lafela amom gavman*

**1** Epes hiasi a' sondape lafela amom gavman.  
Apa' mogawa ina anona gavman nataga dowaf,  
owa'atin. Maol hiani gavmani nataga lagol Godi  
atogol. Ea' gavman amamba hiami magapani,  
God atona nanda'am mape.\*

**2** I'i epen mamahina negesambala basef gav-  
mani, anin nesambala waf Godi wapani. I'i epes  
ami sogosambala amambai, atiasi sofa' akafimi  
awami ma waf afamba esis sanda'afi. \*

**3** Amom gavman ina mapoma mugaumbela  
epes isimba sanda' waf fasifi, owa!. Amom  
mapoma mugaumbela epes isimba sanda' waf  
awafii. I'i ipa' pindaiwa'ma ombal mogahepamam  
amom gavmana, dao' penda' waf bu'wafi atefa  
amom atiasi moganifela agof ipe'igufi. \*

**4** Gavman manda' maola Godi motopalopepa  
pegape andeande!. Apa' i'i ipa' penda' waf awafi,  
ipa' ombal mondahepamam. Ipa' pegawa bainat  
anamba magahapilanai, ina mahapilana dowaf,

---

\* **13:1** Ta 3:1; Pro 8:15; Jo 19:11      \* **13:2 1** Pi 2:13-14; 1 Pi 3:13

\* **13:3** Ro 12:19

owa'. Manda' maol Godi ma mogogwa akafimi awami ma isimba sanda' waf awafii.

<sup>5</sup> Na'amba dei' apa' a' mondape lafela amom. Apa' ina a' ombal mohapama akafimi amamba atom awami ea' mila basef amamifi, owa'. Apa' mundaila malogof fagape opalef ape'ilifi nomon monda'as na'amba.

<sup>6</sup> Isimba atis dei' ipa' panda' tekis. Dei' main, amom gavman manda'mana maol Godi dondol banagem mumafi maol inimba atin. \*

<sup>7</sup> Ipa' maol inimba napomepa ma pegaso'am hiahawes sasisasi epes amamba, pendaso'am. Amom mogofa'asa tekisi, pese'ama tekis. Amom mogofa'asa moni maisa mogatala waf mu'uli gavmani, pese'am. Dembami mamahoma manda' maol bu'wani nandahama epes sogasa'ma agof amamugufi, dao' pendafe' lafela amom. Ipa' sonehepa ma pegasa'ma agofa anom amam, dao' pesa'ma agof amamugufi.\*

### *Dei' si'i maina apa' magaila mu'uli Godi endilisi?*

<sup>8</sup> Ipa' ina pewaola anof wiafa moni mais fo-taoma anin epen, owa'i. Apa' anof wiaf atotof fondotaomapa atapif. Wiaf afamba ukup ipe'ipi pigapigaila anis sahin owan hiasi. Dei' main, epen mamahina okom mogamogaila anin epen daiani, anin nagaila mu'uli inimba endilisi.

<sup>9</sup> Apa' mogawa mu'uli inimba naga'ias na'amba na'i, "Ina' owa'i nehambombaga waf daso'amaifia ea' owa'i neha anis amam nematawa soga'a, owa'i nenda' wala, ea' ina a' kowolena ma hiahaom anis daindaiasi, owa'i."

\* **13:6** Mt 22:21    \* **13:7** Mt 22:39-40; Je 2:8

Mu'uli inimba naloma anin mu'uli mamahina nagapani wapani, kofagena inimba atin naga'i na'amba na'i, "Ina' okom mimila anis epes dais na'amba atin si'i okom magapoma ina' atina."\*

**10** Epen ami okom maimaila anin epen daiana nagaso'an opaf anini, inimba ina nanda' waf awafi ma anin, owa'. Epen inimba okom magam-agaila anin epen daiani, anin naila mu'uli inimba endilisi.\*

### *Apa' mondafe' usi'ipa*

**11** Ae' a'i ipa' penda' waf afambai. Dei' main, ipa' pegawa ea' nogota ata'e dei' magapautai. Nogota ata'e ipa' pekwaha koha pegesafel. Ipa' pegawa fowa' apa' mataga mahapifana dambaipa, nemaf afamba God na'i a' nowambelapa mogotan-imai ata' fapani laogon, apa' dei' fataga felefele' kwasakwasala. \*

**12** Owamb ba'i a' hi'ilamb ea' felefele'ma lola negataga. Na'amba andeande'ma apa' mogak-waha waf hiafi awafi owambifi ma monda' waf usi'ifi alipifi fepe tatala'if si'i mofa' walitapa magahagasa wandafa waf awafi. \*

**13** Apa' mondafe' hilili' andeande' si'i epes sagape alipi. Ina mea' embel banagimbeli mogamogaol ea' gigal mo'oh mi'i basef wandafifi, owa'i. Apa' owa'i monda' waf so'a waulafia monda' salamala basef awafi alugufi. Apa' ina' monda' migimigah mopa' ea' kowolapa ma hia-haom anis epes daisi, owa'i. \*

---

\* **13:9** 1 Ko 13:4-7   \* **13:10** Ef 5:14; 1 Te 5:6-7   \* **13:11** 1 Jo 2:8;  
Ef 5:11, 6:11   \* **13:12** Lu 21:34; Ef 5:18   \* **13:13** Ga 3:27

**14** Apa' dei' pefa' Dembinai Jisas Krais ea' pindawisana si'i klos amamba lu'wami sanda' wandafami pefa'ana pepomana. Ipa' ina ukup pelapefe' ma pigaila nomonas awami alop atonaimi, owa'i.

## 14

*Apa' ina mowalogafe' esis sahin owani, owa'i*

**1** Epen mamahina nagahapifanai, hapif ananini owa' banagania, inimba ipa' pese'an neleemb ipe'ilimbi pefa'an pifi'i piwisi amam nematawa Kristen. Apa' ina pi'i pifitap pelomana basef mamimami, owa'i.\*

**2** Anin epen nahapifana banagen, na' gwa'aimi mamimami hiami. Apa' hapif anin epeni ina banagen, na'amba ina na' mafis maim, owa!.\*

**3** Ea' epen inimba naga' gwa'aimi mamimamii, ina okom iwanim mopoma epen inimba owa' nega' mafisia, owa'i. Ea' epen inimba owa' nega' mafisia ina okom iwanim mopoma epen inimba naga' gwa'aimi mamimamii nanda' waf awafi, owa'i.\*

**4** Ipa' ina pewaloga anin epen nanda' maola anin epen daiani, owa'i. I'i anin nigalutu banagna maol ananini o negewa, isimba maol anen Dembinai nugumafi anini atin. Anin atiasi nigalutu banagani. Dei' main, Dembinai ananinai atona la'ifinama nogowa' banaga anina nigalutu banagen.\*

---

\* **14:1** Jen 1:29, 9:3; Ro 15:7    \* **14:2** Kl 2:16    \* **14:3** Mt 7:1; Je 4:11-12    \* **14:4** Ga 4:10

**5** Anin epen okom mapoma anef nemaf lu'uf a'owa' fikila' anif nimaguf hiafi. Apa' anin daian na'i nimaguf hiafi na'ambaif atin. Epes isimba hiasi atona atin sondameme'ma ukup asasipi atip andeande'.

**6** Epen mamahina okom magapoma anef nemaf be'ef a'owa'i, anin okom mandanda'ma Dembinai dei' nanda'am na'amba. Ea' epen inimba naga' gwa'aimi mamimamii, anin okom mandanda'ma Dembinai na'am. Dei' main, anin nanifela God na'as. Apa' epen inimba owa' nega' gwa'aimi mamimami hiamia, anin okom mapoma Dembinai, dei' nandaiwa'ma anis gwa'aisi. Inimba wapani nanifela God nihi'as.

**7** Apa' mogawa la'afena apa' ina anin epen nape nanda' maol naila okom ananimi atom, owa'. Ea' ina anin epen naila okom ananimi atom naga', owa'atin. \*

**8** I'i apa' mope, dao' monda' maola mogasa'ma agol Dembinaii. I'i mog'a', mog'a'ma mogasa'ma agol Dembinaii. Ea' i'i apa' mope namepa o mog'a', apa' Dembinaii atepa.

**9** Ea' isimba atis Krais naga' notanima ambal lapaona nosafel wapani ma nagape Dembinai ma epes isimba sagaga'i saloma isimba ata' sagape namisi. \*

**10** Dei' maina ipa' pagawalog a sahin owan ipe'isi ma fe' asasini a paga'ipas basef iwanifi? Na'ambai owa'i. Ipa' pegawa anaf apa' hiapai hi'ilapa a' mulutu gani God nope nogowalog a epes hiasima ea' nowalogapa ma basef lu'wafi. \*

---

\* **14:7** Lu 20:38; Ga 2:20; 1 Te 5:10      \* **14:9** Mt 25:31-32; Ap 17:31;  
2 Ko 5:10      \* **14:10** Ais 45:23; Fl 2:10-11

**11** Amamba si'i Baibel na'iam naga'i,  
 "Dembinai naga'iam na'amba na'i, 'Ae' a'i  
 endilisi atis, anaf epes hiasi sindiwa  
 nembawa sotawa sonda' lotuma ae' hi'ilas,  
 ea' sowalapa basef alihif si'if si'i ae'  
 God endilisiwai."\*

**12** Ea' apa' mogawa apa' hiapai atona atin anaf  
 mogipa Goda waf hiafi kofagefa apa' manda'afi.

*Apa' ina monda' anis hiahawes mohambombaga sahin owan, owa'i*

**13** Ea' ipa' ina pewaloga sahin owan ipe'isi ma  
 fe' asasini wapani, hapaimi. Apa' ukup pendanda'  
 na'amba mi'i apa' ina monda' anef wafa monda'  
 owamapa ape'inai nowa nonda' waf awafi, owa'i.  
 \*

**14** Dembinai Jisas ea' nawalipi egawa isimba.  
 Ina anom hiahaom gwa'aisi mafis mais awasim  
 dowadowaf, owa'. Okom epeni atom mandanda'ma  
 anis maefah alugwisi, dei' hiahawes  
 isimba awes alugwis. \*

**15** I'i ina' nea' anis maefaha waf afamba ine'ifi  
 fehambombaga okom owamenai, ina' negawa,  
 waf afambai ina' owa' okom mimila owamenaea,  
 owa'. Krais naga' ea' ma nogowambilai owamena  
 anamba. Ea' ina' owa'i nehambombagana ma  
 gwa'aisi ine'isia. \*

**16** Ipa' ina penda' anef waf anis sahin owan  
 Kristen sitilipa fenda' ukup asasipi iwanip, owa'i.  
 I'i ipa' pi'i waf afamba bu'wafi, ipa' ina penda'afa  
 naep asasipi, hapaifi.

\* **14:11** Ga 6:5    \* **14:13** Ap 10:15; Ta 1:15    \* **14:14** 1 Ko 8:11-13

\* **14:15** Ta 2:5

**17** Waf afamba saga' gwa'aisi embelafi, afambai ina kofagefa ma anamba God nagala'ambemagoma, owa'atin. Anamba waf usi'ifi hilili'i a opalef awanilifi faloma waf sonagahasafi atef fagapoma. Ambal bu'unai Godi naso'apai waf afambai.

**18** Epen ami nepe nanda' maola Kraisii ma owa' nenda' anef waffenda' Kristen ukup iwanipia, atiasi God okom bo'oma waf ananifi ea' epes wapani sogawa anin epen bu'wani.\*

**19** Dei' apa' mundaila waf hiafi fenda' apa' mogape opalef atelifi, a waf usi'ifi hiafi fegewa' banaga hapif esis sahin owani. \*

**20** Ina' okom mopoma gwa'aisi atis ea' neham-bombaga maol Godi, owa'i. Endilisi, hiahawes hiasi gwa'aisi bu'wasi. Apa' i'i ina' nea' anis mae-faha sonda' anin epen newa nenda' waf awafi, dao' ina' wapani nanda' waf awafi.

**21** Ina andeande'ma nega' mafisi embel wain gwa'aisi mais, o nenda' anis maefah mamahisa sonda' owamena nogowa ma waf awafi, owa'i.

**22** Okom ine'imi atom mondanda' neloma Goda hiahawes isimba sonda' owamena nogowai. Epen okom mogapoma anis maefah bu'wasi, okom ananimi ina manda' kotimana hiahawes gwa'aisi mais isimba, anin sonohan. \*

**23** Apa' epen ami okom biafima nega'asa, kofagema ananimi atom. Dei' main, okom ananimi ina nahapilif banagen na'as, owa'. Hiahawes hiasi epes owa' sogahapifanaia sanda'ami, amamba awami.

\* **14:18** Ro 12:18; Ro 15:2    \* **14:19** 1 Ko 8:13    \* **14:22** Ta 1:15

# 15

## *Apa' mundaila okom Kraisi*

<sup>1</sup> Apa' epes magahapifana banagambili, maol ape'ini inimba ma mogatopalopa epes isimba hapif owa' banagania. Esis ina la'ifisa sogofa' nimanimi asasimi, isimba apa' motopalopas mofa' nimanimi asasimi. Apa' ina mila nomonas ape'imi atom, owa'i. \*

<sup>2</sup> Apa' hiapai atona atin monda' maol mondatopalopa epes sagape felefele'ma ape'i ma atiasi sogofa' waf bu'wafi sogataga banages. \*

<sup>3</sup> Apa' mogawa Krais wapani ina sonahana okom ananimi atom, owa'. Waf awafi fatagamana si'i Baibel na'iasa anen naga'i, "Epes sa'i basef findiwaefa ina' ea' basef ifimba atif fafi'i faso'ala ae!..."\*

<sup>4</sup> Dei' main, basef hiafi fowa' amom manda'ef fagail Buki manda'efa fagawalipa apa'. Basef ifimba fegewa' banaga opalef ape'ilifi ma mugalutu banagepa mi'i endilisi atis God notopalopapa ma mogape andeande'.

<sup>5</sup> Apa' mofa'banagami ma God atona nanda'apa malutu banagepa magahapifana. Ae' a'i anen notopalopepa pila waf Krais Jisasi endilisi pigahapila nomonas atifis.

<sup>6</sup> Ama ipa' pegape opalef atifilif a malogof atogof pegasa'ma agol Godi, anen ahama Dembinai ape'inai Jisas Krais.\*

\* **15:1** Ro 14:19; 1 Ko 9:19; 1 Ko 10:24,33   \* **15:2** Sam 69:9   \* **15:3**  
Ro 4:23-24; 1 Ko 10:11   \* **15:6** Ro 14:1

*Krais natopalopa esis Juda saloma isimba owa'  
Judaisia wapani*

<sup>7</sup> Ea' ipa' hipai ukup pindaima atin pendaso'asa nelelemb esis sahin owan si'i Krais wapani naga'so'apa nembel apa', ma epes hiasi sogasa'ma agol Godi lu'wagol.\*

<sup>8</sup> Ae' a'ipipa na'amba. Krais nafi'i nataga nanda' maol nepe lafela nagatopalopa esis Juda. Anen nanda'as na'amba ma nigihimba'masa God naga'i basef endilisifi datimai. Baseffowa'nala'lapef naga'goloma dembami bafapam akupam asasimi fandawalap alihif.\*

<sup>9</sup> Krais nanda' maol inimba ma nogatopalopa esis sogololama Godi owa' Judaisia wapani sogogawa God na'ias esis uwahipisa sogasa'ma agol ananigili lu'wagol, si'i Baibel na'ias naga'i,

“Anaf ae' ewalapa basef i'i agol ine'igili ma anis epes daias sogololama ine'i. Ea' ela analef awalef efela agol ine'igili.”\*

<sup>10</sup> Ea' anif basef Baibel faga'ias na'amba wapani fa'i,

“Ipa' epes pegelelama Godi, pendagala peloma esis wambota ananisi.”\*

<sup>11</sup> Ea' anif du'wanif fa'i,

“Ipa' hipai pegelelama Godi, pendasa'ma agol Dembinaii.

Pendasa'ma agol ananigili ma analef awalef.”\*

<sup>12</sup> Ea' Aisaia wapani na'ias na'i,

“Anaf anona aman notaga wambota Jesii.

Aman anamba a' notaga nope Dembinai ma esis

\* **15:7** 15:24    \* **15:8** Ap 3:25; Ro 11:30; Sam 18:49    \* **15:9** Diu

32:43    \* **15:10** Sam 117:1    \* **15:11** Ais 11:10; Re 5:5

sogololama Godi numafias ea' sohapifana  
si'i endilisi atis anaf anen notopalopas."

**13** Apa' mogawa endilisi notopalopapa ma mogape andeande'. God anen kofagonama amamba. Dei' ae' a'i ipa' pihapifana nonda' dagala lu'wani neloma opalef awanilifi sogataga si'isa ipa'. Ea' a'i banagami Ambal bu'unai ananinai nonda'epa pegawa endilisi atis anaf piti banagami mogogala'i ananimi.

**14** Ipa' alipipai ae'ipai, opaf ae'afi egawa endilisi ma ipa' panda' waf fasifi dondol ea' pegawa gawa hiani naninani. Ea' ipa' ila ma pegaso'as nomonas bu'wasi sahin owan.

**15** Apa' anif basef anda'efa ipe'i ifimba banagafi a'owa' kwasakwasala. Apa' ae' ina ombal mahe andafa'mefa anda'ef, owa'. A'i esa'ma nomonas ipe'isi. Dei' main, God nati ae' uwahipiwi nase'e nembel ae' natopalope dowaf. \*

**16** Ea' anen nanda'e ape anda' maola Krais Jisasa enda' maol la'afena esis sogololama Godi owa' Ju-daisia. Anda' maol si'i amom mondolali ma Godi awalapa basef bu'wafi ananifi. Ae' a'i ifa'ai epes isimba sogololama Godi sifi'mai anen ea' Ambal bu'unai ananinai nonda'as sotaga epes Godi atis bo'wes hilili' egaso'anas anen si'i ofa anen okom maga'ian a'owa'i.

**17** Ae' ape sisihowi aloma Krais Jisas ea' sonahe ma maol inimba anda'ana Godi. \*

**18** Krais atona nase'e banagami anda' maol inimba. Anen natopalope nanda'e banagewe afe'

\* **15:15** Ro 1:5, 12:3; Ro 11:13; Fl 2:17      \* **15:17** 2 Ko 3:5

anda' maol inimba bu'wani awalipa esis sogololama Godi ma silana sogame' basef ananifi. Ae' andaiwa'ma iga'ipipa anif basef daif, owa'. Ifimba atif.

<sup>19</sup> Ambal bu'unai Godi nanda' hiahaom banagami nowa' banagae ma anda' banagami mamimami. Epes hiasi sati banagami amamba ea' same' basef Godi sailif. Dambadamba anda'am Jerusalem awalapa basef bu'wafi ma Krais afe' lauguni hi'alagon itambili itap lu'upa Ilirikam. \*

<sup>20</sup> Maol inimba ae' okom ma'ian a'owa' ma egawalapa basef ifimba bu'wafi anagon esis owa' ata' sogogawa Kraisia. Ae' andaiwa'ma igi' efe' ewalapef fegatoma anif anom mali' mafe' magawalapafi, owa'.

<sup>21</sup> Ae' okom ma'ias si'i basef faga'ias, "Esis epes owa' anis sefe' soga'ipasa basefa aninia, anaf seme'efa sotolona. Ea' epes isimba owa' sogame' basefanaia, anaf seme'efana sogawana."\*

<sup>22</sup> Fowa' anda' maol inimba agawalipasa basef Kraisi. Maol inimbai nahefa uchia'w ae'akwi nimaguf hiafi ea' ina afe'mago ipa', ata' owa'.

### *Pol na'i niti Rom ea' nefe' itap lu'upa Spen*

<sup>23</sup> Apa' dei' ae' maol ake na'a'e. Afagof hiagufi ae' okom ma'i a'owa' ma egafe'mago ipa'. \*

<sup>24</sup> Isimba atis dei' a'i ata' ili' efo'o iti ipa' ma main, efe' itap lu'upa Spen. Ea' a'i ata' ipani nogota laota kwasakwasala endagala elomepa ma

---

\* **15:19** 2 Ko 10:15-16      \* **15:20** Ais 52:15      \* **15:21** Ro 1:10-13

\* **15:23** 1 Ko 16:6

main, dao' ipa' petopalope pilutumi pehapone  
ufia'w kwagafe' Speni.\*

<sup>25</sup> Apa' dei' a'i efe' Jerusalem enda' maol  
etopalopa esis amam nematawa Godi. \*

<sup>26</sup> Esis Kristen sagape Masedoniai saloma Kris-  
ten Griki sa'i basef sandame'maef ea' ma so-  
gowala hiahawes asasisi sonda' du'wanis sefe'  
Jerusalem, sogaso' esis amam nematawa Godi hi-  
ahawes akasi. \*

<sup>27</sup> Endilisi ukup asasipi atip pa'ias ea' dei'  
sanda'as na'amba. Apa' ae' a'i esis sowaolamasa  
wiaf fotaoma esis Kristen sagape Jerusalami.  
Fowa' esis Juda sali' soso'asa basef Godi ma  
sagatopalopa ambagof esis isimba sogololama  
Godi sagape Masedoniai Griki. Isimba atis dei'  
andeande'ma esis sogwamasa wiaf afamba esis  
Judia ma hiahawes sogatopalopa alopi.

<sup>28</sup> Ea' ae' a'i ata' enda' maol inimba hi'ilan  
nil'. A'i ata' ese'asa hiahawes isimba bu'wasi esis  
Jerusalem hi'ilas ama main, ila uchia'w Speni efo'o  
ma ata' ili' itilipa. \*

<sup>29</sup> Ae' egawa ea' nemaf afamba egafe'mago ipa',  
atiasi hiahaom fasimi Kraisi a' mope si'ima ae'  
efo'o etagamepa. \*

<sup>30</sup> Apa' mahapifa Dembinai ape'inai Jisas Krais,  
ea' mogawa Ambal bu'wali Godi nasa'ma ukup  
ape'ipi ma pigapigaila esis sahin owan ape'isi.  
Isimba atis dei' a'ipipa dindinip a'i nomonas isim-  
bai sosa'ma ipa' penda' maol numa'wini pega-

\* **15:24** Ap 19:21   \* **15:25** 1 Ko 16:1; 2 Ko 8:1; 2 Ko 9:2,12; Ap 24:17

\* **15:26** Ro 9:4; 1 Ko 9:11   \* **15:28** Ro 1:11   \* **15:29** 2 Ko 1:11; Kl

4:3; 2 Te 3:1

loma ae' ma beten. Ipa' pendanda' betena God notopalope ae'

<sup>31</sup> nogatagwahowe ma lagof anis epes Judaisi owa' sogahapifanaia. Ipa' pendabetena God nonda' amam nematawa ananisi sagape Jerusalami sondagala ma maol inimba anda'ana agatopalopasani.

<sup>32</sup> I'i God ni'i aho'me ai, efo'o etagamepa epe endagala a'owa' elomepa ata' epoma nomaw' kwasakwasala.

<sup>33</sup> God anen kofagonama opaf awanafi. Ae' a'i anen nope nolomago ipa' hipai. Endilisi.

## 16

*Pol na'ipasa nemaf bu'wafi amam nematawa hiasi*

<sup>1</sup> Ae' a'ipipa ma pigimafi Fibi andeande', ako'w haniti'mafa afa'ikwi kwanda' maol kwagatopalopa esis Kristen sagape Senkriai.

<sup>2</sup> Fibi kwape sisihi'wa Dembinai. Ea' ipa' pendaso' nelelemba ako'w si'i wafbu'wafi apa' amam nematawa Godi monda'afi. I'i ako'w nomonas ni-manisa anis maefaha, ipa' pendatopalopa'w. Dei' main, ako'w kwatopalopa ae' wapani.\*

<sup>3</sup> Ipa' penda'mas nemaf bu'wafi Akila naloma waulu'mana Prisila ea' pi'ipaso dagala ae'ani. Esis bias apa' mandao'oma manda' maol atin Krais Jisasi. Fowa' esis sandandombol endilisi ma sagatopalopa ae'. Nemaf afamba anis sa'i sogah, esis ina ombal mahas, owa'!

<sup>4</sup> Sa'i awi ma sogah' sotopalopa ae' egape namowe. Ea' ina ae' atowe anifela esis bias,

---

\* <sup>16:2</sup> Ap 18:2,18,26

owa'atin. Esis Kristen hiasi fowa' sogolalama Godi wapani, sanifelis. \*

<sup>5</sup> Ea' ipa' pise'asa nemaf bu'wafi ma dagala ae'ani esis Kristen isimba safe' sandakolas sagape ipat asasitai. Ea' pi'ipago Epainetus nemaf bu'wafi ae'afi anen alipunai ae'anai endilisi. Anen nali' nahapifa Krais nali'ma epes hiasi itap lu'upa Esia.

<sup>6</sup> Ipa' penda'makwago nemaf bu'wafi Maria. Ako'w kwanda' maol numa'uni hiani ma kwa-gatopalopepa.

<sup>7</sup> Ipa' pese'amo dagala neloma nemaf bu'wafi ae'afi ma amam amamba Andronikus noloma Junias, amom wapani Judaimi si'i ae!. Amom manda' kalabus magaloma ae'i. Amom aposel ma'i amom biam manda' maol bu'wani Godii. Amom mali'ma ae' mahapifa Krais.

<sup>8</sup> Ipa' pi'ipago Ampliatusa nemaf bu'wafi ma dagala ae'ani. Anen alipunai ae'anai endilisi ma nagape sisihinama Dembinai.

<sup>9</sup> Pi'ipago Urbanus nemaf bu'wafi ae'afi, anen nanda' maol atitin nagaloma ae'i ma maol Kraisi. Ea' pi'ipago Stakisa nemaf bu'wafi wapani. Anen alipunai ae'anai endilisi.

<sup>10</sup> Ea' pi'ipago Apelesa nemaf bu'wafi ae'afi, anen agol gandawalapana nagaila Krais endilisi. Pi'ipasago dagala ma nemaf bu'wafi ae'afi ma esis sagape ipat atota Aristobulusi.

<sup>11</sup> Pi'ipago Herodiona nemaf bu'wafi ae'afi, anen Juda wapani si'i ae!. Pi'ipasago dagala ma nemaf bu'wafi ae'afi esis wambota atota Narsisusi sagahapifa Dembinaii.

---

\* **16:4** 1 Ko 16:15,19; 2 Ti 1:15

<sup>12</sup> Pi'ipawago nemaf bu'wafi ae'afi ma Trifina kwaloma Trifosa, awo biawa wanda' maol numa'uni Dembinaii. Pese'akw nemaf bu'wafi ae'afi ma Persis, ako'w alipu'wi ae'akwi endilisi, kwanda' maol hiani ahifini ma Dembinai. \*

<sup>13</sup> Pi'ipago Rufusa nemaf bu'wafi anen epen bu'unai naloma ma'mana anani'wi ae' wapani egefala'w ma'mai.

<sup>14</sup> Pi'ipasago dagala ae'ani ma nemaf bu'wafi ma Asinkritus, Flegon, Hermes, Patrobas, a Hermes, ea' esis Kristen sahin owan sape sagalomomi.

<sup>15</sup> Ipa' pi'ipasago nemaf bu'wafi feloma dagala ae'ani ma Filologus noloma Julia, ea' Nereus noloma haniti'mana anani'wi, ea' Olimpas, soloma esis amam nematawa hiasi Godi sape sagaloma esisi.\*

<sup>16</sup> Waf afamba apa' amam nematawa Godi, ipa' hipai atona atin pendagala pendaso'asa lagof esis sahin owan hiasi pindanifelis. Amam nematawa Kristen hiasi sagape na'ai sanda'mepago nemaf bu'wafi sandagalamepa.\*

*Anis epes sanda' esis Kristen sandawal biafis sanda'as awes*

<sup>17</sup> Alipipai, ae' a'ipipa dindinipa silisolawi andeande' pegapoma anis epes sanda' waf awafii sanda'ipa' Kristen pendawal biafipa sogosambala basef ifimba ipa' pegefa'afi. Waf afambai esis sanda' epes hiasi sowa awes. Ipa' pese'as alafugah epes isimbai. \*

---

\* **16:12** Mk 15:21 \* **16:15** 1 Ko 16:20; 1 Pi 5:14 \* **16:16** Mt 7:15;  
Ta 3:10 \* **16:17** Fl 3:19; Kl 2:4; 2 Pi 2:3

**18** Esis ina sanda' maola Dembinai ape'inai Kraisi, owa'atin. Sagaila ukupa alop asasipi atopi. Sanda' basef atif usiusihifi ma sambaso'ma opalef saga'i'ipa anis epes isimba owa' sogogawa anef waf bu'wafi awafi andeandi'i'a.\*

**19** Ipa' paila God, dei' epes hiasi sogawepa ea'. Isimba atis dei' ae' sonahema ipa'. Ae' a'i ipa' pendegawa waf bu'wafi endilisi, apa' ipa' ina ukup pendanda'ma waf awafi, owa'! \*

**20** God anen kofagonama opaf awanifi, nogota kwaia'uta ma nofa'asa Satan nogafe' lafela bo'wagah ipe'igahi. Ae' ahali' God andabetena Dembinai ape'inai Jisas Krais notopalopepa dowaf nope atapina nogalomepa.\*

### *Anis epes sanda' nemaf bu'wafi sa'ipa esis Rom*

**21** Wando'oma wanda' maol atini Timoti anen nasapa'ago dagala nemaf bu'wafi ma ipa'. Lusius naloma Jeson a Sosipater, amom Juda wapani si'i ae', amom wapani masapa' nemaf bu'wafi ma ipa'!.

**22** Ae' Tertius, efa' malogola Pol anda'ago basef ifimba. Ae' asapa' basefa nemaf bu'wafi fafe'mago ipa' ma agol Dembinai ape'inai. \*

**23** Gaius nasapa'ago dagala ma nemaf bu'wafi ma ipa'. Anen numafi ae' Pol andeande' ipat ananitai, ea' numafi esis Kristen hiasi wapani safi'i sandakolas na'a'e. Erastus anen nanda' maola gavmani nugumafi otambai taun wambel ambalembai, ea' sahomapa ape'inai Kwartus,

---

\* **16:18** Ro 1:8; Mt 10:16; 1 Ko 14:20      \* **16:19** Ro 15:33; Jen 3:15

\* **16:20** Ap 16:1-2; Ap 19:22, 20:4      \* **16:22** 1 Ko 1:14

amom biam masapa'o basefa dagala bu'wani ma ipa'!

<sup>24</sup> [Ae' andabetena Dembinai ape'inai Jisas Krais notopalopepa dowaf numafipa ma nope nogalomago ipa' hipai. Endilisi.]\*

### *Apa' mondafela agol Godi*

<sup>25-26</sup> Apa' mondasa'ma agol Godi lu'wagol. Anen la'ifinai ma nogowa' banagaip ma basef bu'wafi ananifi agawalapafi, ifimba basef bu'wafi faga'i Jisas Kraisi. Basef ifimba fowa' nimaguf hiafi ata' fape fandambaho', apa' dei' fataga alihifa basef ifimba fowa' amom profet manda'afi afa' wawalapef alihif. God nagape namona atapinai na'i basef dindinipa basef ifimba bu'wafi dei' fataga fandawalap alihifa misi'ah epes hiasi itap anamba hiagoma ma esis hiasi sogahapifana. \*

<sup>27</sup> Anen atotona nogogawai endilisi. Apa' mondasa'ma agol ananigili dondol lifilafi. Jisas Krais atona natopalopapa mondanda'as na'amba. Endilisi.

---

\* **16:24** Ef 1:9, 3:5,9; Kl 1:26; Ro 1:5      \* **16:25-26** 1 Ti 1:17; Ju 25

**Basef Bu'wafi Godi  
The New Testament in the Mufian Language  
Nupela Testamen long tokples Mufian long Niugini**  
copyright © 1998 Wycliffe Bible Translators, Inc.

Language: Mufian

Dialect: Mufian

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2013-07-19

---

PDF generated using Haiola and XeLaTeX on 25 Aug 2024 from source files  
dated 31 Aug 2023

b0cff915-4005-598f-9bbc-38b1e35d47b1